

JOHAN KYATE THEHOOYPAW

Hiinnaw Bya

1:1 Athotakawnaw kya hin Bya tuh alah umtyvae; tuh e Bya tuh Pachia ryte umkheih haeza tuh e Bya tuh Pachia nynh athua. **2** Athotakawpite Bya tuh Pachia ryte a umkheivae hae. **3** Amaw kyate Pachia nynh atynre balyn a rae; raepaw uccawhae balyn kya thuaza tuh e hiinnaw nynh ccungccaw kalan awnaw a thuakhae. **4** Bya tuh hiinnaw aleihpaw thuaza tuh e hiinnaw nynh ccungccaw kalan awnaw a thuakhae. **5** Tuh e awnaw nynh mohnaw lungkhu langkhe awza mohnaw nynh kharyh thei kho khy. **6** Pachia nynh a phunghotu Johan oun shawza, **7** ccungccawhae kya awnaw kong holang te ccungccaw balyn nynh a hopaw phung thae haeza ah zynnawlang hae nynh oun thua. **8** Amaw tuh awnaw thuakhy; awnaw kong ho khylang nynh oun thua. **9** Tuh e awnaw tuh awnaw ahmepaw nynh athua; tuh e awnaw tuh laevaw lang oun thuaza ccungccaw balyn a awsatu nynh athua. **10** Tuh e awnaw tuh laephivaw kya umza amaw kyate Pachia nynh laephi hynh rae salama laephi nynh amaw tuh nyh khy. **11** Amaw ram lungkhu kya oun thua salazema a ccungccawhae nynh ccou khyh hae. **12** Abang nynh ccou haeza ah zyn hae; tukeiccuze Pachia ccawhae thuanaw kaw a pya hae. **13** Laephi phungte Pachia ccaw thua kho thuakhyh cinawpaw suilan tuh laephi ccungccaw paw nynh sapaw ccawte thua kho thuakhy; Pachia ccacci kha mih Paw nynh athua. **14** Tuh e Bya tuh ccungccawlangte oun tangza bading te ngaethyathua-sanawte biate ah laku kyahin a um. A phu-enaw kha ah muih ohza Paw nynh a Ccapaw hoithypaw kya a pyapaw phu-enaw phuin kha nynh athua. **15** Johan nynh tuh e paw kong kha hynte a ho: “Amaw tuh ka nulangte nynh oun thua; thuasalama kae laeze a leehua, pawccecize amaw tuh ka pui mawze alah umvae, cite kae hopya ohpaw kha amaw kong nynh athua,” a ci. **16** Accinpaw a ngaethyathuasanawte aenin tuh hy oun thuavaeza a hythuanaw tuh lukheit koute lukheit oun pya. **17** Pachia nynh Kawbya tuh Moses kyate oun pya; thuasalama a ngaethyathuasanaw te backing tuh Jesuh Kri kyate nynh oun thua. **18** Hum nynh sangma Pachia tuh muih boy

khyh hae. A Paw nynh Ccapaw hoithypaw, a by vawze a pawmpaw, Pachia athuapaw nynh a langsakuvae.

Baptisma Pyatu Johan Phunghopaw

19 Jerusalem khua e Judah kawhoitu-hae nynh abang silawtuhae te Levi ccungccawhae kha Johan kalan byakhia khylang shaw haeza, “Nang hynh hummou?” cite ah khia hae. **20** Johan nynh mih byakhiapaw kha ei leite, “Kae hyn Messiah ka thuakhy,” cite ccaerarilang te ccirarilang a let hae. **21** Mimin nynh, “Athuaze, hummou na thua? Elijah na thua tou? cite ah khia hae. Johan nynh, “Ka thuakhy,” a ci. Mimin nynh, “Profet na thua tou?” ah ci hae. Anin nynh, “Ka thuakhy,” a ci. **22** Mimin nynh, “Athuaze hummou na thua, oun hopya tua?” ah ci hae. “Nae lepaw hyn oun shawtuhae kalan kae thuakhae aho ngaw. Namaw so hum nynh ka thua, cite mou na ciku?” ah ci hae. **23** Johan nynh profet Isaiah hopaw kha oun lakza: “Kae tuh ‘Bawipaw ccianaw laanpi kha lawbabinglang rae oh!’ cite laesiaramze a siapaw roy nynh ka thua,” cite a ci. **24** Farasihae nynh ah shawhaepaw phunghotuhae nynh, **25** Johan elang kha, “Messiah na thuakhyza Elijah te Profet zema na thuakhyh langze pawtemou baptismna pya hae?” cite ah khia hae. **26** Johan nynh, “Kae nynh tuh tuite baptismna pya, thuasalama nae laku kya nah nylei ohpaw lukheit a um. **27** Amaw tuh ka nulangte oun cceih lyaccca, thuasalama kae tuh a phanah rui a phoupatulangte sangma ka ngaekuh khy,” cite a khung hae. **28** Hynte ah khiakunaw hae hmin tuh Johan nynh baptismna pyanaw hae Jordan vaw kyate ninthualang a umpaw Bethany khua kya nynh athua.

Pachia Tuutaraw

29 Amuakaw kya Johan nynh Jesuh a kalan oun cceih cciamangpaw kha muiza, “Laephi seinaw a cciakhaetu Pachia Tuutaraw khuh dotua oh! **30** ‘Ka nulangte ccungccaw lukheit oun ccei, thuasalama amaw tuh kae laeze a leehua, pawccecize ka pui mawze alah umvae,’ cite a konglang ka hohepaw tuh amaw hynh nynh athua. **31** Amaw hyn hum nynh oun thua

ngaw ci paw ka lah nyh khy, thuasalama amaw hyn Israelhae nynh ah nynawlang hae tuite baptisma ka pyanuathehaepaw tuh athua,” a ci. **32** Johan nynh ccaekialangte, “Muisaw nynh vaaw langte vafu hawte oun rungbungza a tungvaw kya a ccupaw kha ka mui. **33** Amaw hyn hum nynh athua ci paw ka lah nyki khy, thuasalama tuite baptisma pyalangte oun shawtupaw Pachia nynh, ‘Muisaw nynh oun rungbung ciza ccungccaw lukheit tungvaw a ccupaw kha na muih ci; tuh e paw tuh Thya Muisaw te baptisma a pyatulangpaw nynh athua,’ cite oun ho pya. **34** Tuh e paw tuh ka muivae. Ccaerarih kae hopya oh: Amaw tuh Pachia Ccapaw nynh athua,” a ci.

Masaty Jesuh Zuituhae

35 Amuakaw kya Johan te a zuituhae lunin tuh tuinkya thadyn ki haeza, **36** a cceipaw Jesuh kha ah muih hae te Johan nynh, “Pachia Tuutaraw khuh dotua oh!” a ci. **37** Tute a hopaw kha zuituhae lunin nynh ah thae hae tuh Jesuh kha ah zui hae. **38** Jesuh nynh a nulang maekuza a zuihaepaw kha a muih tuh, “Pawmou na ccung oh?” cite a khia hae. Mimin nynh, “Rabbi, pawkyamou na um?” cite ah let hae. (Rabbi ci paw tuh sayapaw cinawpaw nynh athua.) **39** Jesuh nynh, “Rang ohla oun dotua oh,” a ci. (Tuh ccyh tuh zete suimilan ccanpalei loukaw nynh athua.) Amaw ryte cceih haeza a umnaw kha ah muih hae te nin balyn amaw ryte ah umkheih hae. **40** Mih lakuze lukheit tuh Simon Peter netaw Andru nynh athua. **41** Vaekheitmawte a u Simon kha a muite, “Messiah tuh ka muivae,” cite a ho pya. (Messiah ci paw tuh “Kri” cinawpaw nynh athua.) **42** Tuinte Simon tuh Jesuh kalan a cciakhae. Jesuh nynh amaw tuh doza, “Na min tuh Johan ccapaw Simon nynh na thua, thuasalama Sefas cite ko na thua ci,” a ci. (Sefas ci paw tuh Peter ci pawte lokuza asuilan tuh ‘Lungpi,’ cinawpaw nynh athua.)

Jesuh Nynh Filip Te Nathanael A Ko Hae

43 Amuakalang Jesuh tuh Galilee lang ccialangte a paccyngku. Filip kha

muiza a kyakhe, “Oun zui!” a ci. **44** (Filip tuh Bethsaida khuapaw thuaza Andru te Peter hae umnaw khua nynh athua.) **45** Filip nynh Nathanael tuh tongkuza a kyakhe, “Moses Kawbya cca-uk kya a konglang ah zeihaepaw te profethae nynh a konglang ah zeihaepaw kha kae muivae. Amaw tuh Josef ccapaw Jesuh, Nazareth khuapaw,” a ci. **46** Nathanael nynh, “Nazareth khua kyate uccahoopaw tuh pou kho ngawzaw tou?” cite a khia. Filip nynh, “Oun cceih la oun do tua,” a ci. **47** Jesuh nynh Nathanael a kalan oun cciapaw kha muiza, “Israel ccungccaw ccacching nynh athua; a thinlung hyng hunaw paping um khy!” a ci. **48** Na thanael nynh, “Pawtemou nae ny?” cite a khia. Jesuh nynh, “Filip nynh ae ko maw ebung ku kaw na um lyaze kae muivae,” a ci. **49** Nathanael nynh, “Saya, nang tuh Pachia Ccapaw nynh na thua! Nang tuh Israel Siangpahrang nynh na thua!” a ci. **50** Jesuh nynh, “Ebung ku kaw na um lyaze kae muivae, ka ci keiccuze nae zyn thua ta? Hynh laeze bapihuapaw patae nae muih ung ci!” a ci. **51** Te mih balyn kyakhe, “Baccacking kae hopya oh: Vaaw oun hongkupaw te Ccungccaw Ccapaw tungvaw kya Pachia vaawhae rungbung kaethung ah umhaepaw kha nae muih cih oh,” a ci.

Kanan Khua Kya Zudypoy

2:1 Nin nin koute Galilee pee Kanan khua kya zudypoy a um. Jesuh a nung zema tuinkya umza, **2** Jesuh te a zuituhae kha ah ko bua hae. **3** Mih mitsurtui athate a nung nynh Jesuh kyakhe, “Mitsurtui hoivae khyh hae,” cite a ci. **4** Jesuh nynh, “Kae hyn, hynh e hyn rae, khah e kha rae, cite nae hopyalangpaw ka thuakhy; ka ccyh thua loh khy,” a ci. **5** Jesuh nung nynh sinumhae kyakhe, “Ae hopya ohpaw miakaw lak oh,” a ci. **6** Judahae nynh kuit singkupaw phung ah hoi hae hawte tuinkya lungre tawngtaruh a um. Lungre tawngkheit nynh galan sungthum cia a ccaawng. **7** Jesuh nynh sinumhae kyakhe, “Hynh e lungrehae kya tui pheh bia tua oh,” a ci. Aleikulang ciate bia haeza, **8** mih kyakhe, “Lungre lungkhu e tui kha sua ohla moy tuanaw e thohaepaw kalan pya oh,” a ci. Tui tuh pya haeza, **9** tui tuh mitsurtuilang oun tangza a ta tua. Pawkyate nynh mitsurtui hyn oun thua ci paw nyh khy, (thuasalama tuisuatu sinumhae tuh mang nyh hae);

tukeiccuze zudypaw kha koza, **10** a kyakhe, “Humhung nynh zema mitsurtui ahooyhuapaw kha masaty kya pya haeza ccungccaw balyn ah byn hae koute mitsurtui huataw kha ah pyahe hae. Thuasalama nang tuh ahooyhuapaw mitsurtui kha atu cia na naungku ung!” cite a ci. **11** Galilee pee Kanan khua kya Jesuh nynh masaty ngae-annaw a rae. Tuinkya a phu-enaw langkuza a zuituhae nynh ah zyn hae. **12** Tuh e koute Jesuh te a nung, a netawhae te zuituhae tuh Kapernaum khua lang cceih haeza tuinkya nin zyatari ah hae-ung hae.

Beikinn Lang Jesuh A Ccei

13 Pongpou Poy ccyh vyavya zawvaeza Jesuh tuh Jerusalem lang a ccei. **14** Beikinn lungkhu kyakhe vaetua, tuu te valaeleh zuatuhae te mihi ccaboy kya a dahunghaepaw phuarutuhae kha a muih hae. **15** Tukeiccuze khuiruih kha ccaungbualang rawikuza tuu te vaetua hae te sahiiniae balyn kha Beikinn tolang marya a dei hae. Phuarutuhae ccaboy balyn marya dawlehpah haeza mihi phua balyn pong a hipyahae. **16** Te valaeleh zuatuhae elang kha, “Hein kyate nae valaelehae balyn cciakhae oh! Ka Paw inn tuh kungkunawlang mang nangvae oh!” cite kaw a pyahae. **17** A zuituhae nynh, “Pou Pachia, na inn ka raepekunaw nynh ka lungkhu kya maei hawte nynh oun u,” cite Ccathya nynh a ci paw kha oun nythui hae. **18** Judah kawhoituhae nynh oun cceih ki haeza, “Hyncihawpaw uccaw rae khonaw ka hoi, ci paw langsakunawlang pawcihawpaw ngae-annaw mou nae raepah ci?” cite ah khia hae. **19** Jesuh nynh, “Hynh e Beikinn hyn phou ohla ninthum lungkhu ka sah thui kho ci,” a ci. **20** Mimin nynh, “Ninthum lungkhu na sah kou ngawzaw tou? Hynh e Beikinn sanaw kya hyn sungpalei kumtaruh aro!” ah ci hae. **21** Thuasalama Jesuh nynh a hopaw Beikinn tuh amaw a pyn kha nynh athua. **22** Tukeiccuze Jesuh chinaw kyate oun thoothuite a zuituhae nynh amaw pyn kong nynh a ho ci paw kha nythui haeza Ccathya te Jesuh nynh ah hohaepaw kha ah zyn hae.

Ccungccaw Thuanaw Jesuh Nynh Nynaw

23 Jesuh tuh Pongpou Poy lungkhu Jerusalem khua a um lyaze ccungccaw patae nynh ngae-annaw a raepaw ah muih hae keiccuze amaw kha ah zyn hae. **24** Thuasalama Jesuh nynh a thinlung balynte zyn khyh hae, pawccecize mih balynte marya a ny hae. **25** Mih konglang tuh miccanghae nynh hopya ho khy, pawccecize mih thinlung pawte nynh aci ci paw tuh amaw nynh marya a ny kou.

Jesuh Te Nikodemas

3:1 Farasihae buu kya e Nikodemas cihaepaw Judah piccan lukheit alah um. **2** Zikheit tuh Jesuh kalan oun cceiza Jesuh kyakhe, “Rabbi, nang tuh Pachia nynh shawpaw saya nynh na thua ci paw kae ny. Ngae-annaw na raehaepaw hyn Pachia paleite hum nynh sangma rae kholang khyh hae,” cite a ci. **3** Jesuh nynh, “Baccacking kae hopya: humzema puithui athuakhyh langze Pachia Peenaw muih kholang khy,” cite a ci. **4** Nikodemas nynh, “Pawtemou pi-ccan nynh tuh puithui kho athua ci? A nung voe lungkhu lang teete vaenin puinaw tuh thua kholang khy,” a ci. **5** Jesuh nynh, “Baccacking kae hopya: humzema tui te Muisawte puithui athuakhyh langze Pachia Peenaw lungkhu lang tee kholang khy. **6** Ccungccaw tuh pynsawlangte nung te paw nynh sapaw nynh athua, thuasalama muisawlangte tuh Muisaw nynh sapaw nynh athua. **7** Na puithui hahe cih, kae ci paw keiccuze na ngae-an thua nang sa. **8** Khivae tuh a rynaw miakaw lang a zaw; a thung tuh na thae, thuasalama pawkyate oun zawza paw kalan nynh a cceih ci, ci paw na nyh khy. Muisaw nynh sapaw miakaw zema tuhawte nynh ah thua hae,” cite a ci. **9** Nikodemas nynh, “Pawtemou tute acyikuh kho ci?” a ci. **10** Jesuh nynh, “Nang tuh Israelhae laku kya ccanpatu minthang lukheit na thuaza hynh e sang na nyh kho khyh tou? **11** Baccacking kae hopya: kaenin tuh kae nypaw kae hoza kae muipaw kae phy; thuasalama hum nynh sangma kae hopaw laawkuh ry khyh hae. **12** Hynh e laephi konglang kae hopaza nae zyn khy; tute athuaze pawtemou vaawlang konglang kae hopyavaeze nae zyn thya ci? **13** Vaaw langte oun rungbungpaw Ccungccaw Ccapaw holeite hum sangma vaaw lang a kaepaw umboy khy,” a ci. **14** Moses nynh laesiaram

ky a ccaung vawlang daw fupaw a taw hawte Ccungccaw Ccapaw zema oun taw ci hae; **15** tukeiccuze amaw a zynpaw miakaw nynh zungzae hiinnaw ah hoi ci hae. **16** Pawccecize Pachia nynh laephi hyn eih a sungsah keiccuze a Ccapaw hoithypaw oun pyaza amaw a zynpaw miakaw tuh chivaelang khyh haeza zungzae hiinnaw ah hoi ci hae. **17** Pawccecize laephi vawlang Pachia nynh a Ccapaw oun shawpaw hyn laephi bapiatulang oun shaw khy, laephi khumtulang nynh oun shaw. **18** Humzema Ccapaw a zynpaw tuh bapianaw inglang khy; thuasalama a zynleipaw tuh Pachia Ccapaw hoithypaw a zyn khyh keiccuze bapianaw a ingvae, pawccecize Pachia Ccapaw hoithypaw kha zyn khy. **19** Bapianaw tuh hynte nynh athua: laephi vawlang hein awnaw oun thua, thuasalama ccungccawhae nynh awnaw laeze mohnaw kha ah ryhua hae, pawccecize ah laawhaepaw balyn tuh athahpaw cci nynh athua. **20** Humzema uccahoylei a latu nynh tuh awnaw kha huaza awnaw kalan ma cceih khy, pawccecize uccahoylei a raepaw kha oun lang sei ngaw ci paw kha a phang keiccu nynh athua. **21** Thuasalama humzema ahmepaw a raepaw nynh tuh awnaw kalan oun cceiza a raepaw kha Pachia kawngaete raepaw nynh athua ci paw kha awnaw nynh a langsaku,” a ci.

Jesuh Te Johan

22 Tuh e koute Jesuh te a zuituhae tuh Judea pee lang cceih haeza tuinkya mimin ryte sosoh um haeza baptism a pya hae. **23** Johan zema Salim te asawleinaw Ainon kya baptism a pya bua; pawccecize tuinkya tui patae um. Ccungccawhae nynh a kalan oun cceih haeza baptism kha a pya hae. (**24** Hynh e tuh Johan thonginn kya ah saw maw hae nynh athua.) **25** Abang Johan zuituhae te Judapaw lukheit ryte thyasakunaw phung kong ah eikuh hae. **26** Tukeiccuze Johan kalan cceih haeza, “Sayapaw, Jordan kyate ninthualang e namaw ryte na umkheih ohpaw te a konglang na hopaw kha na nyh ung khaw? Atulya baptism a pya cciamang haeza ccungccaw miakaw nynh a kalan oun cceih hae,” ah ci hae. **27** Johan nynh, “Pachia nynh pyapaw cileite hum nynh zema pawsangma ccoupaw hoilang khyh hae. **28** Kamaw ccacci nynh, ‘Kae tuh Messiah ka thuakhy,

oun shawtyhaepaw nynh ka thua,’ cite ka hopaw a thaetu ccaekia tuh nanin nynh nah thua oh. **29** Dypaw monung tuh a dytu ccanvaepaw nynh ccoupaw nynh athua; thuasalama zudytu ccanvaepaw a banpaw, thadynte roy a ngaepaw nynh ccanvaepaw roy a thaete tuh a lung myarya tua. Tuh e lungtuanaw tuh ka uccaw thuaza ka lungtuanaw tuh accin. **30** Amaw tuh a kaethung ciza kae tuh ka rungbung ci,” a ci

Vaaw Langte Oun Rungbungpaw

31 Vaaw langte oun rungbungpaw tuh ccungccaw balyn laeze a leehua. Laephi kyate oun thuapaw tuh laephi uccaw thuaza laephi bya konglang nynh a ho, thuasalama vaaw langte oun thuapaw nynh tuh pawpaw tungvaw balyn a um. **32** Amaw nynh a muipaw te a thaepaw ho salazema hum nynh sangma a phunghopaw tuh pawm khyh hae. **33** Thuasalama hum nynh zema a phunghopaw a pawmtu nynh tuh a pawmpaw liate Pachia tuh ahmepaw nynh athua ci paw kha a tyn sa. **34** Pachia shawpaw nynh tuh Pachia nynh a Muisaw accinpaw kha a pya keiccuze Pachia bya kha a phy. **35** Paw nynh a Ccapaw tuh sungsaza pawpaw balyn kha a huhan lungkhu kya a naung. **36** Ccapaw a zynpaw miakaw tuh zungzae hiinnaw ah hoi hae; Ccapaw kaw a eipaw tuh hiinnaw hoilang khyh haeza Pachia detanaw kaw khe ah um cih hae.

Jesuh Te Samarianung

4:1 Jesuh tuh Johan laeze zuitu alawng-hua hoiza baptisma alawnghua a pya hae ci paw kha Farasihae nynh ah thae hae. **2** (Ccacingte cilangze Jesuh amaw nynh hum sangma baptisma pya khyh hae; zuituhae kyalya nynh ah pya hae.) **3** Tute ah hohaepaw kha Jesuh nynh a thae tuh Judea ram kyate toykuza Galilee lang a ki ki. **4** A kipawte Samariaram a cciapaw bia. **5** Jakob nynh a ccapaw Josef kya pyapaw looram kyate asawleinaw Samariaram kya Sikhar cikupaw khua khokheit kya a thua. **6** Tuinkya Jakob tuikhua umza Jesuh tuh khuaccongnaw kyate a ba keiccuze tuikhua pe kya a dahung. Tuh ccyh lya tuh ninthu loukaw nynh athua. **7**

Samarianung tuh tui thelang oun cceiza Jesuh nynh a kyakhe, “Tui nialangpaw oun pya tua,” cite a ci. (**8** A zuituhae tuh looh re khylang kholae lang ah cceih hae.) **9** Nopinung nynh, “Nang tuh Judapaw na thuaza kae tuh Samarianung nynh ka thua - pawtemou tui nialangpaw nae ngia?” a ci. (Judahae tuh Samariahae mangpaw anphehae kha mang ry khyh hae.) **10** Jesuh nynh, “Pachia nynh ae pyapaw hyn pawpei athua ci paw, te tui ae ngiatu hyn humpei athua ci paw nyh laze amaw hyn na ngia paleh ciza amaw nynh hiinnaw tuize ae pya paleh cipaw!” a ci. **11** Nopinung nynh, “Bawipaw, batin na hoi khyza tuikhua hynh myarya khu. Pawkyu emou tuh e hiinnaw tui tuh na laaw ngaw? **12** Kae mingpaw Jakob nynh hynh e tuikhua hyn oun pya; amaw te a ccawhae te a sahiinhae balyn nynh tuikhua kya e hyn ah nia hae. Jakob laeze ka leehua cite tou na tuaku?” a ci. **13** Jesuh nynh, “Humzema hynh e tui a neihpaw tuh tui a haw ki ci, **14** thuasalama humzema ka pyalangpaw tui a neihpaw tuh tui hawvaelang khy. Kae nynh ka pyalangpaw tui tuh a lung khu kya tuidylang a tang ciza tuh e nynh hiinnaw pyatu tui te zungzae hiinnaw a pya ci,” cite a ci. **15** Nopinung nynh, “Bawipaw, tuh e tui tuh oun pya tua! Tuinte tui ka haawvaelang khyza hein kalan tui thelang ka ccia ma hovaelang khy,” a ci. **16** Jesuh nynh, “Lah cceih la na vawpaw lah ko la oun ki,” a ci. **17** Anin nynh, “Vawpaw ka hoi khy,” a ci. Jesuh nynh, “Vawpaw ka hoi khyh na ci paw tuh ahmepaw nynh na ho. **18** Vawpaw lupangaw na hoivaeza atu na ungkhaepaw hyn na vawpaw ccacching thuakhy. Ahmepaw nynh nae ho pya,” a ci. **19** Nopinung nynh, “Bawipaw profet na thuapaw kha kae ny. **20** Kaenin Samariahae kae nungpawhae nynh hynh e mua vawte Pachia ah lah beik hae, thuasalama nanin Judahae nynh Pachia tuh Jerusalem kyate beiklangpaw nynh athua nah ci oh,” cite a ci. **21** Jesuh nynh a kyakhe, “Nopinung, ka hopaw hyn zyn; ccungccawhae nynh Pachia tuh hynh e mua kya thuasa, Jerusalem kya zema thuasa, oun beik khyh nin hae ccyh oun thua ci. **22** Nanin Samariahae nynh nah beik ccacching ohpaw nah nyh khyh oh; thuasalama kaenin Judahae nynh tuh kae beikpaw kae ny, pawccecize Judahae kyate nynh khumnaw tuh oun thua. **23** Thuasalama Pachia Muisaw huhan liate Pachia a beik ccacchinghaepaw nynh Paw tuh muisaw te baccing te oun

beik nin hae ccyh oun thua ciza heinkya a umvae; tute a beiktuhae tuh Paw nynh a ccung hehaepaw nynh ah thua hae. **24** Pachia tuh Muisaw thuaza a beikhaepaw nynh muisaw te baccing te ah beiklanghaepaw nynh athua,” a ci. **25** Nopinung nynh a kyakhe, “Messiah oun thua ciza atynre balyn amaw nynh oun hopah ci, ci paw ka ny,” a ci. **26** Jesuh nynh, “Na kyaze a ho lyaccyapaw hyn tuh e paw tuh nynh ka thua,” a ci. **27** Tuh ccyh lyakhe a zuituhae tuh oun ki haeza nopinung ryte ah beikuhaepaw kha ah muih hae tuh mih ngae-an myarya thua. Thuasalama hum nynh sangma tuh e nung kha, “Pawmou na ry?” cite khia khyh haeza, Jesuh khazema, “Pawlangmou hynh e nung te bya nah hokuh oh?” cih ki khyh hae. **28** Tuinte nopinung nynh a dawre kha cciatawte kholae lang kiza ccung-ccawhae kyakhe, **29** “Nulang e uccaw ka raepaw balyn a hokhotupaw hyn oun dotua oh! Amaw hyn Messiah tuh thuaccave ma?” a ci. **30** Tukeiccuze kholae te pou haeza Jesuh kalankhe ah cceih hae. **31** Tuh ccyh lyakhe a zuituhae nynh Jesuh kha, “Sayapaw, looh ae hin!” cite ah hopya hae. **32** Thuasalama anin nynh, “A konglang nah nylei ohpaw aelangpaw looh ka hoi,” a ci. **33** Tukeiccuze a zuituhae nynh, “Lukhakheit nynh looh a pya hae thuaccah ngawzaw?” cite mimaw kyakhe ah khiakuh hae. **34** Jesuh nynh mih kyakhe, “Ka looh tuh oun shawtupaw a rynaw rae te ryalaw oun pyapaw thasah hynh nynh athua. **35** Tousenawze, ‘Sapalei koute looh rawe ccyh,’ nah ci oh. Thuasalama baccacking kae hopya oh: loohae hyn hooyte dotua oh; looh tuh pheh voy kouvaeza rawe ccyh azawvae! **36** Looh a rawetupaw tuh ninro kha pya thuaza looh tuh zungzae a hiinnaw hanlang a ccakhungku. Tukeiccuze a ccouutupaw te a rawetupaw mih lung ah tua kalang ci. **37** Pawccecize tousenaw nynh, ‘Ccungccaw lukhakheit nynh a tu, miccangpaw lukheit nynh a aw,’ ci paw tuh ahme. **38** Nah laaw boyleinaw oh loo kya looh rawelang kae shaw oh. Tuinkya miccanghae nynh ah lah laaw tynaw hae kyate mih ryalawnaw keiccuze amiat nah mawe oh,” cite a ci. **39** Nopinung nynh, “Ka lah raetypaw balyn oun hopya kou,” cite a ho keiccuze tuh e khua kya umhaepaw Samariahae patae nynh Jesuh tuh ah zyn hae. **40** Tukeiccuze a kalankhe Samariahae nynh cciate kae kya um hin, cite ngia haeza tuinkya Jesuh tuh ninnin a um. **41** A bya hopaw kha ah thaehaepawte ccungccaw

hou lawng nynh ah zyn hae. **42** Te mimin nynh nopenung kyakhe, “Na hopaw keiccuze atu kae zynpaw thuakhy, thusalama kaemaw ccacci nynh a bya kae thaeza amaw hyn laephi khumtu ccacring nynh athua ci paw kha kae ny keiccu nynh athua,” ah ci hae.

Jesuh Nynh Bawi Lukheit Ccapaw A Dang Sa

43 Tuinkya ninnin a um koute Jesuh tuh pouza Galilee langkhe a ccei. **44** Pawccecize amaw ccacci nynh, “Profet tuh amaw ram lungkhu kya sawtuanaw mawe khy,” a lah ci. **45** Galilee kya a thuate tuinkya e hae nynh ah lah doyhaw hae, pawccecize Jerusalem Pongpou Poy kalan a cceihaepaw nynh tuin poy lungkhu kya a uccaw raepaw balyn ah muih hae keiccu nynh athua. **46** Tuinte tui mitsurtuilang a tangsanaw Galilee pee Kanan khua lang a cceih ki. Kapernaum khua kya ccapaw a ccihpaw accozah bawi lukheit tuinkya a lah um. **47** Jesuh tuh Judea kyate Galilee lang oun thua ci paw a thaete vyavya a chipaw a ccapaw umnaw Kapernaum lang ccianualang a ngia. **48** Jesuh nynh a kyakhe, “Ngae-annaw te khuaruaru uccawhae nah muih boyvae khyh ohze nanin nynh tuh nah zynvaelang khyh oh,” a ci. **49** Tuh e bawi nynh, “Bawipaw, ka ccapaw a chi maw hin beh cciatua si,” cite a ci. **50** Jesuh nynh a kyakhe, “Lah cceih, na ccapaw tuh a hiin ci!” a ci. Tuh e paw nynh Jesuh bya kha zynza a ccei. **51** Inn lang a ccianaw laanpi kyate a sinumhae nynh thungpangte lah cciadoy haeza, “Na ccapaw tuh a hiin ci!” cite ah ci hae. **52** Hotuh ccyh kya mou ka ccapaw tuh a danghua ci paw a khia hae te mimin nynh, “Inkhawnin zete suimilan ccankheit kya a ngesaw akya,” ah ci hae. **53** Tuh ccyh tuh Jesuh nynh, ‘Na ccapaw a hiin ci,’ a lah ci ccyh nynh athua, cite a paw nynh a nythui. Tukeiccuze amaw te a innbynhae balyn nynh ah zyn hae. **54** Hynh e tuh Jesuh nynh Judea kyate Galilee lang a thua koute vaeninnaw ngae-annaw a raepaw nynh athua.

Kuaa Kin Kya Ngeccih Dangsanaw

5:1 Tukoute Jesuh nynh Jerusalem khua kya beiknaw ccankheit kalan a

ccei. **2** Jerusalem khua kya Tuu Sakuih pee khe kuaa umza tuinkya buu bupangaw a um. Tuh e kya tuh Hebru byate Bethzatha ah ci hae. **3** Tuin buuhae kyakhe ngeccih buupihae tuh pong hawekuh haeza, tuh e hae tuh mitzu, ccukhou, te kuitccu chihaepaw nynh ah thua hae, (Mimin nynh tui a ccohpaw kha ah ngaw hae, **4** pawccecize accyh ccyvaeze Bawipaw vaawpaw nynh oun rungbungza tui kha a ccosah he. Tui a ccohvaeze a phaungkutypaw tuh mih ccinaw kyate ah dang hae keiccu nynh athua.) **5** Tuinkya ccungccapaw lukheit sungthum kum tarya a ccipaw a um. **6** Tuinkya a hawekupaw kha Jesuh nynh a muite ccyh saepi a ccivae ci paw ciakha a ny. Tukeiccuze Jesuh nynh, “Dang na ry tou?” a ci. **7** Ngeccipaw nynh, “Bawipaw, tui oun ccoh ccyh kya kuaa lungkuu lang oun phaungtulangpaw hum sangma um khy. Tui lungkuu lang ka rungbungccaw ka ci lyakhe minghae nynh oun thoikhaw hae,” a ci. **8** Jesuh nynh, “Tho la, na phia kha laawkuh la ccei,” a ci. **9** Vaekheitmawte ccungccapaw tuh a dang; a phia kha laawkuza a ccei. Tute acyiku nin tuh Sabbath nin nynh athua. **10** Tukeiccuze Judah kawhoituhae nynh dangnaw a mawetupaw elang kha, “Atunin hyn Sabbath nin thuaza na phia na puikupaw hyn ah phung na rawse,” ah ci hae. **11** Anin nynh, “Kae oun dangsatupaw nynh na phia hynh laawkuh la, cceih oun ci pya,” a ci. **12** Mimin nynh, “Tute ae citupaw tuh hummou?” ah ci hae. **13** Thuasalama dangnaw a mawetupaw nynh Jesuh kha hum nynh athua ci paw nyh khy, pawccecize tuinkya mibuupi um haeza mih lakute Jesuh tuh zya a lah cceivae. **14** Nyathyakou kya tuh e paw kha Jesuh nynh Beikinn lungkuu khe muiza, “Do tua, atu tuh na dangvae; tukeiccuze lah sei nangvae, athuakhyze hynh e laeze uccathahpaw hou oun cyikuh ci,” a ci. **15** Tukoute ccungccapaw nynh cceiza Judah kawhoituhae kyakhe a dang-satupaw tuh Jesuh athua kha a hopya hae. **16** Tukeiccuze mimin nynh Jesuh kha vawsawnaw pyalangte ah paccyngkuh hae, pawccecize Sabbath nin kya dangsanaw kha a rae keiccu nynh athua. **17** Jesuh nynh mimin kyakhe, “Ka Paw tuh zungzaete rya lakza kae zema ka laaw hahe aho,” a ci. **18** Tute a hopaw keiccuze Judah kawhoituhae tuh amaw chialang kha hou ah ccangsa hae; Sabbath phung a ro kyalya thualeite Pachia tuh amaw a Paw kyalya langte hoza Pachia tuhte a raeku cite ah

tua hae.

Ccapaw Kawhoinaw

19 Tukeiccuze Jesuh nynh mimin kha let haeza, “Baccacking kae hopya oh: Ccapaw nynh a kawte pawsangma rae kho khy; a Paw nynh a raepaw a muipaw kyalya kha nynh a rae. Paw nynh Ccapaw khazema a rae bua.

20 Pawccecize Paw nynh Ccapaw kha sungsaza a raepaw balyn kha amaw a muih sa. Hynh e laeze raelangpaw aleepaw kha a muisah ung ciza nae ngae-an oun thua ung ci. **21** Paw nynh michi thoosaza hiinnaw a pya hae hawte Ccapaw nynh zema hiinnaw hoisah a ryhaepaw kyakhe hiinnaw a pya bua hae. **22** Paw nynh hum tungvaw kya sangma bapianaw rae khy. A Ccapaw kyakhe bapianaw kaw balyn kha a pyavae. **23** Tukeiccuze Paw sawtuanaw nah pya oh hawte Ccapaw zema nah pya bua cih oh.

Humzema Ccapaw sawtuanaw a pyaleipaw tuh a shawtu Paw kha sawtuanaw pya khy. **24** “Baccacking kae hopya oh: humzema ka bya thaeza oun shawtupaw a zynze tuh zungzae hiinnaw a hoivae. Bapianaw ingvaelang khy, chinaw kyate hiinnaw kalan a suloivae. **25** Baccacking kae hopya oh: a chihaepaw nynh Pachia Ccapaw roy ah thae cih haeza a thaetuhapeaw balyn hiinnaw ah mawenaw hae ccyh oun thua lyaccaza thuazema a thuavae. **26** Paw amaw cca-cci hyn hiinnaw a leihpaw athua hawte Ccapaw zema hiinnaw a leihpawlang a raevae. **27** Te Ccapaw tuh Ccungccaw Ccapaw athua keiccuze bapianaw kaw a pya. **28** Hynh e konglang hyn nae bungzou nang sa; michi balyn nynh roy thae haeza, **29** mih ssaw kyate oun thoo nin hae ccyh oun thua mangccia: ahooypaw a raehaepaw tuh hiinnaw kalan ah thoo cih haeza oun hiin cih hae; te athahpaw a raehaepaw tuh thoo hae salazema seibapia ah thua cih hae.

Jesuh Ccaekiahae

30 “Ka kawte pawsangma ka rae kho khy; bapianaw ka raeze Pachia nyh oun hopya thyte nynh ka rae; tukeiccuze ka bapianaw tuh ahme, pawccecize ka rynawte raelangpaw kha ka zuakuh khyza oun shawtupaw

a rynaw kyalyate ka rae keiccu nynh athua. **31** “Kamaw nynh kamaw konglang kha ka ho athuaze ka hopaw tuh ahmepaw nynh athua cikuh thyalang khy, **32** thuasalama kamaw ccaanlangte ka konglang a holangpaw ccungccaw lukheit umza ka konglang a hopaw tuh ahmepaw nynh athua, ci kha ka ny. **33** Johan kalan nae phunghotuhae kha nae shaw ohza amaw nynh ahmepaw kha a hopya hae. **34** Hynte ka hovaeze ccaekia ka hoi aho ka ci rynawpaw thuakhy; khumnaw nah mawe thyanawlang ohpaw ka honawpaw nynh athua. **35** Johan tuh ruaza a awpaw maei-innte nynh aloku, ccyh sosoh kya a awnaw nynh nanin kha lung ae lah pawsah oh. **36** Thuasalama kamaw ccaanlang ccaekia ka hoiza Johan ka ccaekialang a tangpaw laeze a leehua; tuh e tuh Paw nynh oun pyapaw ka uccaw raehaepaw kha thua haeza tuh e hae nynh Paw nynh oun shawnawpaw kha ah langsaku hae. **37** Te oun shawtu Paw nynh zema ka konglang kha ming a nysah hae. A roy nah thae boy khyh ohza a maee zema nah muih boy khyh oh; **38** te a phung zema nae thinlung kya nah ccykuh khyh oh, pawccecize a shawpaw nah zyn khyh oh. **39** Nanin nynh Ccathya lungkhu kya zungzae hiinnaw kae muih vema cite tuanaw nah hoi oh keiccuze nah ria, nah ccankuh oh. Hynh e Ccathyahae balyn nynh ka konglang cci nynh ah ho hae. **40** Thuasalama hiinnaw hoinaw khylang ka kalan nah cceih ry khyh oh. **41** “Ccungccaw kyate thehooysanaw ccoulang ka ccung khy. **42** Thuasalama pawcihaw ccungccaw ci kha kae nyh ohza nae thinlung kya Pachia nah sungsaleinaw oh kha ka ny. **43** Ka Paw kawhoinawte nynh kae thua, thuasalama kae kha nae ccou khyh oh. Ccungccaw lukheit amaw kawhoinawte oun thuapaw kha nah ccou paleh oh. **44** Lukheit te lukheit kyate thehooynaw ccou kha nah ry oh, thuasalama amaw kyalya Pachia athuapaw kyate thehooynaw mawelang kha nah zuakuh khyh oh; tute athualangze pawtemou kae tuh nae zyn kho cih oh? **45** Kae hyn ka Paw kalan thang oun thuipah cih cite oun tua nang oh. A tungvaw ngaehoinaw nah hoi ohpaw Moses nynh nae thang oun thui ci. **46** Moses hyn lah zyn ccacking ohlaze kae zema nae zyn cih oh, pawccecize anin nynh ka konglang khaw a zei. **47** Thuasalama amaw zeipaw nah zyn khyh oh keiccuze pawtemou ka hopaw tuh nah zyn kho cih oh?” a ci.

Jesuh Nynh Ccungccaw Thungpangaw Looh A Dang

6:1 Tukoute Jesuh tuh Galilee Tuili khuraw lang a ccei. (Tuh e Tuili tuh Tiberias Tuili cite zema ah ci hae.) **2** Ngae-annawte ngeccih patae a dangsapaw kha ah lah muih hae keiccuze mibuopi nynh amaw tuh ah zui hae. **3** Jesuh tuh mua vaw lang kaeza a zuituhae ryte ah dahung hae. **4** Pongpou Poy ccyh tuh anaevae. **5** Jesuh nynh a pepang kha a do tuh mibuopi nynh amaw kalan oun cciahaepaw kha a muipawte Filip kyakhe, “Hynh e ccungccawhae azawlang pawkye e looh mou relang?” cite a khia. **6** (Hynte a khiapaw tuh Filip nynglenawlang a khiapaw nynh athua; ccaccing cilangze pawmou ka lak cih ci kha a nytyvae.) **7** Filip nynh, “Ccungccaw lukheit nynh pytarite aelang zema ccungccaw hynzet aelang tuh ngun phua zanin me laeze alawnglangte re langze nynh azaw ngaw,” a ci. **8** A zuituhae lakuze ccangpaw lukheit, Simon netaw Andru nynh, **9** “Barli sanglou phepangaw te ngasaw zawnin hoipaw heinkya imapaw a um. Thuasalama ccungccaw hynzet hanlang tuh zaw thyalang khy,” a ci. **10** Jesuh nynh mimin kyakhe, “Ccungccawhae kha dahungsah oh,” a ci. (Tuinkya lonua myarya alawng.) Te ccungccawhae tuh dahung haeza mi balynte thungpangaw loukaw ah cih hae. **11** Jesuh nynh sanglou kha lakza Pachia kalan luungkunaw bya a ho koute tuinkya a dahunhaepaw kha a nei hae. Ngasaw zema tucite a cyih koute mibuu-pi nynh ah ae khonaw hae ciate ah ae hae. **12** Ah byn hae koute Jesuh nynh a zuituhae kyakhe, “Ah aebanghaepaw marya oun soilua oh; pytari sangma hi nang oh si,” a ci. **13** Alaepaw tuh soilua haeza barli sanglou phepangaw lungkhu kyate mibuopi nynh ah ae hae koute shua hawlaenin acih. **14** Jesuh nynh ngae-annaw a raepaw a muihaepaw tuinkya e ccungccawhae nynh, “Laevaw lang oun thua cih cihaepaw Profet tuh amaw ccaccing hynh nynh athua!” ah ci hae. **15** Mibuopi nynh mih siangpahranglang tangsah khylang oun naangbia cih hae ci paw kha Jesuh nynh a ny; tukeiccuze tuin kyate amakhaete mua lang a ccei.

Tui Vawlang Jesuh A Ccei

16 Zete oun thuate Jesuh zuituhae tuh tuili kalan cceibung haeza, **17** long lungkhu lang ah tee hae koute tuili rawlang e Kapernaum khua langkhe ah ki ki hae. Khuazi ryacia mih kalan Jesuh tuh thua loh khy. **18** Tuh ccyh lya khise oun thoza tuileit oun tho. **19** Long tuh zaw haeza mengthum mengpalei loukaw ah cceih hae te tui vawlangte mih kalan oun cceiza mih kalan oun naekupaw kha ah muih hae tuh myarya ah rhih hae. **20** Jesuh nynh mih kyakhe, “Rhih nang oh, kamaw nynh ka thua!” a ci. **21** Tuinte lungtuate Jesuh tuh mih long lungkhu lang teesah haeza ah ccia rynawlang hae hmin kya aromawze ah thua hae.

Ccungccawhae Nynh Jesuh Ah Ccung Hae

22 Amuakalang kya tuili khurawlang a umhaepaw mibuupi nynh tuinkya long ccankheit kyalya nynh a um ci paw te Jesuh tuh a zuituhae ryte long lungkhu lang tee khyh hae ci paw te zuituhae lalyte nynh ah ccia hae ci paw kha ah ny hae. **23** Tiberias langte oun thuapaw ccangpaw longhae tuh Bawipaw nynh luungnawbya a ho koute mibuupi nynh sanglou ah aenaw hae hmin pe tuili kin kya oun thua hae. **24** Tuinkya Jesuh te a zuituhae um khyh hae ci paw kha mibuupi nynh ah muih hae te tuh e longhae kha ccikuh haeza Jesuh ccung ah ryhaepawte Kapernaum lang ah cceih hae.

Hiinnaw Sanglou Jesuh

25 Tuili khurawlang Jesuh a umpaw kha ccungccawhae nynh ah muih hae te mimin nynh, “Saya, hotumou heinkya na thua?” ah ci hae. **26** Jesuh nynh, “Baccacking kae hopya oh: nae ccung ohpaw hyn ngae-annawhae ka raepaw nah thae thya oh keiccu thuakhy, sanglou nah ae taeleilang oh ciate nah ae oh keiccu nynh athua. **27** Aroh thyapaw looh hanlang rya lak nang oh; tulaeze zungzae cia atynpaw hiinnaw looh hanlang lak oh. Tuh e looh tuh Ccungccaw Ccapaw nynh ae pya cih oh, pawccecize Paw Pachia nynh a lungry thuanaw syntawnaw kha a tungvaw khe a khiaavae,” a ci. **28** Tukeiccuze mimin nynh, “Pachia nynh lak hae sah cite oun rypyapaw laawlangpaw tuh pawmou kae lak ci?” ah ci hae. **29** Jesuh nynh, “Pachia

ynh laawsah ae ry ohpaw tuh a shawpaw zynlangpaw kha nynh athua,” a ci. **30** Mimin nynh, “Kae muiza kae zyn thyanawlang pawcihaw ngae-annaw mou na rae ci? Pawmou na raelangpaw tuh? **31** Ccathya nynh, ‘Ah aelang hae vaaw langte a pya hae,’ cite a ho hawte kae mingpawhae nynh tuh laesiaram kya manna sanglou ah ae hae,” ah ci hae. **32** Jesuh nynh, “Baccacking kae hopya oh: Moses nynh ae pya ohpaw tuh vaawlang e sanglou thuakhy; ka Paw nynh vaawlang sanglou ccacding tuh ae pya oh. **33** Pawccecize Pachia nynh pyapaw sanglou tuh vaaw langte oun rungbungza laephi hiinnaw a pyatu hynh nynh athua,” a ci. **34** Mimin nynh, “Bawipaw, tuh e sanglou tuh zungzae oun pya tua,” cite ah ngia hae. **35** Jesuh nynh mimin kyakhe, “Kae hyn hiinnaw sanglou nynh ka thua. Ka kalan oun cceipaw tuh a voelaw boyvaelang khy; kae oun zynpaw tuh a tui haaw boyvaelang khy. **36** Thuasalama kae hopyavae oh hawte mang nae muih oh pite nae zyn ry khyh oh. **37** Ka Paw nynh oun pyapaw miakaw tuh ka kalan oun cceih cih hae. Ka kalan oun cceipaw miakaw tuh ka dawehlang khyh hae, **38** pawccecize vaaw langte kae rungbungnawpaw tuh ka rynaw rae khylang thuakhyza oun shawtupaw a rynaw rae khylang nynh kae rungbung. **39** Te kae oun pyapaw balyn kha ccankheit sangma zosah leite nyathya ninze mih balynte ka thoosalanghaepaw kha oun shawtupaw rynaw nynh athua. **40** Pawccecize ka Paw nynh a rypaw tuh Ccapaw kha muiza a zyntu balyn nynh zungzae hiinnaw ah mawenawlanghaepaw kha nynh athua. Te mimin kha nyathya ninze hiinnaw kalan a thoosah cih hae. **41** “Kae hyn vaaw langte oun rungbungpaw sanglou nynh ka thua,” a ci keiccuze ccungccawhae tuh ah bo hae. **42** Tukeiccuze mimin nynh, “Hynh e paw hyn Josef ccapaw Jesuh thuakhyh ta? A nung te a paw tuh ah ny ohpaw khaw! Pawtemou vaaw langte kae rungbungpaw a ci thya?” ah ci hae. **43** Jesuh nynh, “Naemaw te naemaw kya bo nangvae oh! **44** Oun shawtupaw nynh ka kalan ae dong khyhlang ohze humsangma ka kalan nah thuakholang khyh oh; te ka kalan oun cceipaw tuh nyathya nin vaeze hiinnaw kalan ka thoosah ci. **45** Profethae nynh, ‘Humhung zema Pachia nynh a ccanpah ci,’ cite ah lah zei hae. Humzema Paw kya e ngaeza a ccankupaw tuh ka kalan oun cceih hae. **46** Humzema Paw ah muivae hae, ka ci rynawpaw thuakhy; Pachia

kyate oun thuapaw lukheit kyalya kha nynh Paw muitu tuh athua. **47** Baccacring kae hopya oh: a zynpaw tuh zungzae hiinnaw a hoi. **48** Kae hyn hiinnaw sanglou nynh ka thua. **49** Nae mingpawhae nynh laesiaram kya manna sanglou tuh ah ae hae, thuasalama ah chih hae. **50** Thuasalama vaaw langte oun thuapaw sanglou tuh phuin ccangpaw thuaza a aepaw balyn tuh chilang khyh hae. **51** Kae hyn vaaw langte oun thuapaw a hiinpaw sanglou nynh ka thua. Humzema hynh e sanglou a aepaw tuh zungzae a hiin ci. Hynh e laephi nynh hiinnaw a mawe thyanawlang ka pyalangpaw sanglou tuh ka saw nynh athua,” a ci. **52** Tute a ci keiccuze mih laku kya thinria bya eikunaw pouza, “Pawtemou hynh e paw nynh ah aelang ohpaw a saw tuh oun pya kho ci?” ah ci hae. **53** Mimin kyakhe Jesuh nynh, “Bacca-ccing kae hopya oh: Ccungccaw Ccapaw saw nah ae khyh ohza a chii nah nia khyhlang ohze nae lungkhu kya hiinnaw nah hoilang khyh oh. **54** Humzema ka saw aeza ka chii a neihpaw tuh zungzae hiinnaw hoiza nyathya nin kya hiinnaw kalan ka thoosah ci. **55** Pawccecize ka saw hyn looh ccacking thuaza ka chii hyn nialangpaw ccacking nynh athua. **56** Humzema ka saw aeza ka chii a neihpaw tuh ka lungkhu kya a hiin, te kae ma a lungkhu kya ka hiin. **57** A hiinpaw Paw nynh oun shawza Paw keiccuze kae zema ka hiin. Tuthyhawte humzema kae oun aetu tuh kae keiccuze ah hiin bua cih hae. **58** Vaaw langte oun rungbungpaw sanglou ci paw tuh hynh e hynh nynh athua: nae mingpawhae nynh ae haeza aromawze ah chihapaw sanglou hawpaw kha thuakhy. Hynh e sanglou a aetu tuh zungzaete a hiin ci,” a ci. **59** Hynh e tuh Kapernaum khua sinakok kya a ccanpyalya haeze Jesuh nynh a hopaw nynh athua.

Zungzae Hiinnaw Byahae

60 Amaw a zuituhae balyn nynh tuh e tuh thae haeza, “Oun ccanpyanaw myarya rhu. Hummou a thae kho ci?” ah ci hae. **61** Ho khyh hae salama ah bo hae ci paw kha Jesuh nynh a nypawte mimin kyakhe, “Hynh e nynh nae lung ae thasaccah oh ta? **62** Ccungccaw Ccapaw hyn a lah umtynaw lang a kipaw kha muih oh laze pawtepei nah ci oh? **63** Hiinnaw a pyatu tuh Pachia Muisaw nynh athua; ccungccaw pyntsaw tuh kharyh ccungkia

khy. Nae kya ka hopaw byahae nynh hiinnaw pyatu Pachia Muisaw tuhoun thua sa. **64** Thuasalama abang nynh nah zyn khyh oh,” a ci. (Jesuh nynh atakawte hummou oun zynleilangpaw te hummou oun phetulangpaw ci kha a nytyvae.) **65** Te Jesuh nynh, “Hynte athua keiccukhazaw Paw nynh ka kalan oun cciasah hae cileite tuh hum sangma ka kalan oun cceih kholang khyh hae, cite kae hopyanaw ohpaw tuh athua!” a ci. **66** Tukeiccuze Jesuh zuituhae ccung-ccaw patae tuh ki haeza ah cciataw hae. **67** Tukeiccuze a zuituhae luhawlaenin elang kha,” Nanin so nae cciatawbua cih oh tou?” cite a khia hae. **68** Simon Peter nynh, “Bawipaw, hum kalan mou kae cceih ci? Zungzae hiinnaw bya a hoitu tuh nang khaw! **69** Te atu tuh Pachia kyate oun thuapaw Mi Thya na thuapaw kha kae zynzakaе ny,” a ci. **70** Jesuh nynh, “Nanin laenin hyn kamaw nynh kae poohpaw nynh nah thua oh, thuakhyh zaw? Thuasalama nae laku kya lukheit tuh satan nynh athua!” a ci. **71** A honuatherypaw tuh Simon Iskariotccapaw Judas kong kha nynh athua. Pawccecize zitu laenin laku a papawathuapite Judas tuh amaw a phetulangpaw nynh a thua.

Jesuh Te A Netawhae

7:1 Tukoute Jesuh tuh Galilee pee langkhe khua a ccong; Judea pee langtuh ccong ry khy, pawccecize tuinkya e Judah kawhoituhae nynh chialang ah ry hae. **2** Boeibuu Poy kha naevaeza, **3** tukeiccuze a netawhae nynh akyakhe, “Na uccaw raepaw hyn ae zuituhae nynh ah muinawlang hae heinkyate Judea pee lang ccei. **4** Ccungccaw patae nynh nypawlang tang a ry langze hum nynh sangma a uccaw raepaw kha tharuh boy khy. Hyncihawuccaw hyn na rae keiccuze laephi pynpi nynh na kong marya ae nyh hae sa!” ah ci hae. (**5** Amaw a netawhae cia nynh ma zyn khyh hae.) **6** Jesuh nynh mimin kyakhe, “Ka hanlang ccyh zaw loh khy. Nanin hanlang tuhvangci ccyh zema nae ccyh nynh athua. **7** Laephi nynh nanin tuh ae hua khyh oh, thuasalama kae tuh oun hua, pawccecize nae umtu zia hooy khyhcite palei ka ho keiccu nynh athua. **8** Poy tuanaw lang tuh lah cceih oh. Kae tuh ka ccyh azaw loh khyh keiccuze tuh e moy kalan tuh ka cceilang khy,” a ci. **9** Tute a ho koute Galilee kya a um ung.

Boeibuu Poy Kya Jesuh

10 A netawhae balyn poy kalan ah cceih hae koute Jesuh zema a cceih bua; thuasalama po langkulangte ccialeite arulangte nynh a ccia. **11** Poy lungkhu kya Judah kawhoituhae nynh ccung haeza, “Pawkyamou a um?” cite ah khia hae. **12** Mibuupi nynh a konglang kha aphirulangte ah hokuh hae. Abang nynh, “Ccungccahoypaw nynh athua,” cih haeza, abang nynh, “Thuakhy, ccungccawhae a cciakhaeseipaw nynh athua,” ah ci hae. **13** Hum nynh sangma po langkulangte ho ngang khyh hae, pawccecize Judah kawhoituhae kha ah rhih hae. **14** Tuh e poy akhankuh athate Jesuh tuh Beikinn kalan cceiza ccanpyanaw a tho. **15** Judah kawhoituhae tuh myarya mih khuarua ruza, “Hynh e paw hyn pawkyaw sangma ccankunaw a hoiboyleipaw re, pawtemou hynzet hyn a ny kho?” ah ci hae. **16** Jesuh nynh, “Kae ccanpya ohpaw hyn kamaw kyalyate kae ccanpya ohpaw thuakhy, oun shawtupaw Pachia kyate oun thuapaw nynh athua. **17** Pachia rynaw rae a rypaw hum nynh zema ka ccanpyanaw hyn Pachia kyate oun thuapaw tou, kamaw kyalya kawhoinawte ka hopaw tou, ci kha a nyh ci. **18** Humzema amaw kawhoinaw kyalyate a hotu nynh tuh amaw hanlang phu-enaw kha nynh a ccung. Thuasalama amaw a shawtupaw hanlang phu-enaw a ccungtu tuh miding thuaza a lungkhu seinaw umleipaw nynh athua. **19** Moses nynh Kawbya ae pya oh, thuakhyh zaw? Thuasalama hum nynh sangma tuh e Kawbya tuh nah zui khyh oh. Pawccemou chialangte nae paccyngnuaku oh?” a ci hae. **20** Mibuupi nynh, “Na lungkhu kya satan nynh a um ngaw. Hummou chialang ae ci?” ah ci hae. **21** Jesuh nynh, “Ngae-annaw ccankheit kae raepah ohza nae khuarua aru. **22** Moses nynh nae ccapawhae vindungawkunaw kaw ae pya oh, tuh e tuh Moses nynh lah thoty khy, nae mingpawhae nynh athua’; tukeiccuze nae ccapaw kha Sabbath nin kya vindung nah aw oh. **23** Moses Kawbya thuleinawlang nae ccapaw kha Sabbath nin kya vindung nah awlang ohze, pawccemou kae nynh Sabbath nin kya ccungccaw lukheit ka dangsavaeze ka tungvaw kya nae thin aria? **24** Atolang donawte byapae nang oh; ahmepaw athuanaw kha dote byapia oh,” a ci.

Amaw Hynh Messiah Thua Tou?

25 Jerusalem khua e hae abang nynh, “Judah kawhoituhae nynh ah paccyngnuakuhaepaw hyn hynh e paw hyn thuakhyh tou? **26** Do tua oh! Ccungccawhae kya alangkulangte bya hoza mimin nynh a kyakhe pawsangma ho khyh hae. Hynh e paw hyn Messiah nynh athua cite ah ny hae keiccu thuaccah ngawzaw? **27** Thuasalama Messiah oun langkuvaeze paw kyate nynh oun thua ci kha hum nynh sangma nylang khyh hae. Te hynh e paw hyn paw kyate nynh oun thua ci paw tuh ah balynte ah ny kou ohpaw,” ah ci hae. **28** Jesuh nynh Beikinn lungkhu kya a ccanpya lya hae khe roy pheh ccaethelangte, “Kae hyn pawkyate nynh oun thua ci paw nae nyh ccacching oh tou? Kamaw ka kawte kae thua khy. Oun shawtupaw tuh ahmepaw thuaza nanin nynh nah nyh khyh oh. **29** Thuasalama kae nynh tuh ka ny, pawccecize amaw nynh oun shawza a kyate nynh kae thua,” a ci. **30** Tuinte mimin nynh amaw kynglang kha ah zuaku hae, thuasalama hum nynh sangma kyng khyh hae; pawccecize accyh kha thua loh khy. **31** Thuasalama mibuupi laku kyate patae nynh zyn haeza, “Messiah oun thua ccacchinglangvaeze hynh e paw nynh a raepaw laeze ngae-annaw alawnghua rae ngawzaw?” ah ci hae.

Jesuh Kynglang ah Shaw Hae

32 Jesuh konglang ccungccawhae nynh ah hokuhaepaw kha Farasihae nynh ah thae hae te silawtu piccanhae ryte Jesuh kyngsah khylang Beikinn rintuhae kha ah shaw hae. **33** Jesuh nynh, “**0** Nae kya ccyh sosoh tari ka um ciza tukoute oun shawtupaw kalan ka cceih ci. **34** Nae ccung oh salazema nae muilang khyh oh, pawccecize ka umnaw lang tuh nah cceih kholang khyh oh,” a ci. **35** Judah kawhoituhae nynh mih kyakhe, “Ah muih thyaleinaw oh tuh paw hmin kalan mou ccialang a paccyngku? Ah ccungccawhae umnaw Grik khuahae kalan cciate Grik ccungccawhae ccanpyalang paccyngku ccah ngawzaw! **36** ‘Nae ccung oh salama nae muilang khyh oh, ka um cinaw hmin kalan ma nah cceih kholang khyh oh,’ cite oun ci. A hopaw suilan hyn pawpei?” ah ci hae.

Hiinnaw Pyatu Tuidy

37 Nyathyakou te asungepaw poy nin kya Jesuh nynh thadynte pheh ccaethelangte, “Humzema tui a hawpaw tuh ka kalan oun cceih sala oun neih sa. **38** Ccathya nynh, ‘Humzema kae oun zynpaw tuh a thinlung kyate hiinnaw pyatu tuidy a phyh ci,’ a ci hawte athua ci,” a ci. **39** Hyncite Jesuh nynh a hovaeze amaw zyntu balyn nynh Muisaw ah mawenawlanghaepaw kong a horynawpaw nynh athua. Tuh ccyh lya tuh Muisaw kha pya thua loh khy, pawccecize Jesuh tuh phu-enaw kalan thoosah thua loh khy.

Mibuupi Ah Phiakuh Hae

40 Tucite a hopaw kha mibuupi lakuze abang nynh ah thae haete tuh, “Hynh e paw hyn Profet ccaccing nynh athua,” ah ci hae. **41** Miccanghae nynh, “Amaw tuh Messiah nynh athua!” ah ci hae. Thuasalama abanghae nynh, “Messiah tuh Galilee langte oun thualangpaw thua ngawzaw tou! **42** Ccathya nynh, ‘Messiah tuh Siangpahrang David cihan athua ciza David a lah umnaw Bethlehem khua kyate a pui ci,’ a ci,” ah ci hae. **43** Jesuh keiccuze mibuupi laku kya phiakunaw oun pou. **44** Abang nynh kyng ah ry hae, thuasalama hum nynh sangma kyng tatung khyh hae.

A Zynleihapaw Judah Kawhoituhae

45 Beikinn rintuhae ah ki haete silawtu piccanhae te Farasihae nynh, “Pawccemou nae thuakhae khyh oh?” ah ci hae. **46** Beikinn rintuhae nynh, “Hynh e paw hawte hum sangma bya ho boy khy,” ah ci hae. **47** Farasihae nynh, “Nanin so ae ling buavae oh tou? **48** Judah kawhoituhae lakuze lukheit sang, athuakhyze Farasihae lakuze lukheit sang amaw zyntu nah ny ohpaw umboy tou? **49** Mibuupi tuh Moses Kawbya a nyleihapaw, tukeiccuze mimin tuh Pachia ccaesanaw zakaw nynh ah um hae!” ah ci hae. **50** Tuinkya umhaepaw Farasihae lakuze Nikodemas cihaepaw, Jesuh te a tongkuh boyhaepaw a lah um. Anin nynh mimin kyakhe, **51** “Ah

phung hawte ho langze ccungccaw lukheit tuh amaw khalan ah thae maw oh te a raepaw ah ny maw oh tuh sei ah phusah thya cih oh tou?” a ci. **52** Mimin nynh, “Nang hynh ma Galileepaw tou na thua bua? Ccathya hyn ria la Galilee kyate profet pou boy khyh, ci kha na nyh ci,” ah ci hae.

A Sei Lyacca Kyngahaepaw Nopinung

9:1 (Tukoute ccungccaw balyn tuh mihi inn raveh langkhe ah cceih hae, thuasalama Jesuh tuh Oliv Mua lang a ccei. **2** Amuakaw awkhua takaw kya Beikinn lang a cceih ki. Ccungccaw patae nynh koylui haeza Jesuh nynh dahungte mimin kha a ccanpya hae. **3** Phungbya sayahae te Farasihae nynh pise ryte a sei cciamangpaw nopinung kha oun hoy haeza mipi malang khe ah thadynsah hae. **4** Jesuh kyakhe, “Saya, hynh e nung hyn pisehae ryte ah sei lyacca haeze oun kynghaepaw nynh athua. **5** Ah phung lungkhu Moses nynh kawpya thyhawte tucihawpaw nopinung tuh lungtute pheh chilang dehlangpaw nynh athua. Nang pawtepei na tua?” ah ci hae. **6** Hynte ah khianawhaepaw tuh Jesuh kha sei phusah thyanawlang kaang ah syahaepaw nynh athua. Thuasalama anin nynh laekhulang balingza a kuitdungte ccaaw a zei. **7** Tucite mihi thadynlangte bya kha palei ah khia hae keiccuze Jesuh nynh lawbabinglangte dahungza mihi kyakhe, “Nae laku kyaze seinaw a rae boyleipaw nynh masatylang lungtute deh oh,” a ci. **8** Tuinte baling kiza laephi kya ccaaw a zei ki. **9** Tuh e ah thae haete lukheit nukhu lukheit ccawe haeza a piccanhuapaw a ccawe ty. Jesuh kyalya kha cciataw haeza tuin a malang kya nopinung kyalya nynh a thadyn. **10** Lawbabinglang a dahung koute nopinung kyakhe, “Pawkyamou ah um hae? Sei ae phusatuhhaepaw lukheit sangma umvae khyh hae tou?” a ci. **11** Nopinung nynh, “Bawipaw, hum sangma umvae khyh hae,” a ci. Jesuh nynh, “Kae nynh zema sei kae phusah bualang khy. Lah cceih la, lah sei nangvae,” a ci.)

Laephi Awnaw Jesuh

12 Jesuh nynh Farasihae kyakhe ho kiza, “Kae tuh laephi awnaw nynh ka

thua. Humzema kae oun zuipaw tuh hiinnaw awnaw a hoi ciza mohnaw lungkhu lang cceivaelang khy,” a ci. **13** Farasihae nynh a kyakhe, “Namaw na thuanaw kong tuh namaw nynh na hoku; tukeiccuze na hopaw hyn ame kharyh ung khy,” ah ci hae. **14** Jesuh nynh, “Thuakhy, kamaw kong tuh kamaw nynh ka ho zema ahmepaw nynh athua, pawccecize pawkyate nynh kae thua ci paw te tei lang nynh ka cceih cih ci paw ka ny. Nanin nynh pawkyate nynh kae thua ci paw te tei lang nynh ka cceih cih ci paw nah nyh khyh oh. **15** Nanin nynh laephi phung thyte bya nah pia oh; kae nynh tuh hum tungvaw kha sangma bapianaw ka rae boy khy. **16** Thuasalama bapianaw hyn ka lah rae salazema ka bapianaw tuh ahme ci, pawccecize tuh e kya tuh ka makhae kyalya ka thuakhy; oun shawtu Paw ka kya a um. **17** Nae Kawbya kya, ‘Bya thaetu lunin mih lung ah ccing kalang athuaze ah hohaepaw tuh ahmepaw,’ cite a um. **18** Kamaw kong tuh kamaw nynh ka hoza oun shawtu Paw nynh ma ka konglang tuh a ho bua,” a ci. **19** Mimin nynh, “Teikyamou na paw tuh a um?” cite ah khia hae. Jesuh nynh, “Kae thuasa, ka Paw thuasa, nah nyh khyh oh. Kae nae nylang ohze ka Paw zema nah nyh bua cih oh,” a ci. **20** Hynh e hae balyn a honaw tuh Beikinn lungkhu lungsing thingkuahae ah naungnaw hae khaan kya a ccanpya lya haeze a hopaw nynh athua. Te hum nynh sangma kyng khyh hae, pawccecize accyh thua loh khy.

Ka Ccianaw Lang Nah Cceih Kholang Khyh Oh

21 Jesuh nynh mimin kyakhe thoki haeza, “Kae tuh ka cceih ci; kae kha nae ccung cih oh, thuasalama nae seinaw kyakhe nah chih oh. Ka ccianaw lang nah cceih kholang khyh oh,” a ci. **22** Tukeiccuze Judah kawhoituhae nynh, “A cceih cinaw lang tuh nah cceih kholang khyh oh oun ci. Amaw te amaw a chiakunawlangpaw a horypaw thuaccave ma?” ah ci hae. **23** Jesuh nynh, “Nanin tuh akawlang e hae nynh nah thua oh, thuasalama kae tuh avawlang e nynh ka thua. Nanin tuh hynh e laephi kyate oun thuapaw nynh nah thua oh, thuasalama kae tuh hynh e laephi kyate oun thuapaw ka thuakhy. **24** Tukeiccukhaw nae seinaw lungkhu kya nah chih cih oh, kae cinaw ohpaw tuh! Te ‘Kamaw tuh Kamaw nynh ka thua,’ ci hyn nae zyn

khyhlang ohze nae seinaw lungkhu kya nah chih cih oh,” a ci. **25** Mimin nynh, “Hummou na thua?” cite ah khia hae. Jesuh nynh, “Athotakaw kyate kae hopyavae ohpaw kha nynh athua. **26** Nae konglang hopyalangpaw zema patae ka hoiza patae sei phusah nah ccang zia oh zema holangpaw ka hoi. Thuasalama oun shawtupaw tuh ahmepaw thuaza amaw kyate ka thaepaw kyalya kha hynh e laephi kya hyn ka phy,” a ci. **27** Jesuh nynh mimin kya Paw konglang a hopaw kha thae thy a khyh hae. **28** Tukeiccuze mimin kyakhe, “Ccungccaw Ccapaw hyn nae taw ohte ‘Kamaw tuh Kamaw nynh ka thua,’ ci kha nae nyh cih oh. Tuinte kamaw kawhoinaw kyalyate ka raepaw uccaw paping um khy, thuasalama Paw nynh holangte oun nawpaw kyalya ka ho kha nae nyh cih oh. **29** Te oun shawtupaw tuh ka kya umza ka makhaete oun cciataw boy khy, pawccecize a lungrypaw kyalya nynh ka laaw,” a ci. **30** Hynh e bya a thaehaepaw patae nynh ah zyn hae.

A Lawehaepaw Te Seehae

31 Tukeiccuze Jesuh nynh amaw a zynhaepaw kyakhe,” Kae ccanpya ohpaw nah zui ohze ka zuituhae ccacring nah thua cih oh; **32** baccing nah nyh cih ohza baccing nynh nanin ae lawesah cih oh,” a ci. **33** Mimin nynh, “Kaenin tuh Abraham cihan kae thuaza hum see sangma kae thua boy khy. ‘A lawepaw nah thua cih oh,’ nah civaeze pawmou na horypaw?” ah ci hae. **34** Jesuh nynh mimin kyakhe, “Bacca-ccing kae hopya oh:humzema seinaw a raetu tuh seinaw see nynh athua. **35** See tuh innbyn lungkhu kya zungzaete um kho khy, te ccapaw tuh innbyn lungkhu kya zungzaete a um. **36** Ccapaw nynh ae lawesah oh athuaze a lawepaw ccacring nynh nah thua cih oh. **37** Abraham cihan nah thua ohpaw tuh ka ny. Thuasalama chialangte nae paccyngnuaku mamin oh, pawccecize kae ccanpya ohpaw nah pawm khyh oh. **38** Ka Paw nynh oun muisapaw konglang kae hopya oh, thuasalama nae paw nynh ae hopya ohpaw kha nah laaw oh,” a ci. **39** Mimin nynh, “Kae paw tuh Abraham nynh athua,” ah ci hae. Jesuh nynh, “Abraham a ccawhae ccacring nah thualang ohze amaw nynh a laaw hawte khaw nah lak bua cih oh. **40** Ka laawpaw balyn hyn Pachia kyate

bacding ka thaepaw kae hopyanaw ohpaw nynh athua; thuasalama nanin nynh tuh chialangte cci nae paccyngnuaku oh. Abraham nynh tucihawpaw kharyh rae boykhy. **41** Nanin nynh nah rae ohpaw hyn nae paw nynh a laawpaw nynh athua,” a ci. Mimin nynh, “Pachia amaw kyalya hyn kae Paw tuh thuaza kaenin hyn a ccawhae ccacding nynh kae thua,” ah ci hae. **42** Jesuh nynh mimin kyakhe, “Pachia hyn nae Paw ccacding lah thua salaze nae sungsah cih oh, pawccecize Pachia kyate kae thuaza atu heinkya ka um. Kamaw kawte oun thuapaw ka thuakhy, thuasalama amaw nynh oun shawpaw nynh ka thua. **43** Ka hopaw hyn pawccemou nah thae thya khyh oh? Ka phunghopaw hyn nah thae ry khyh oh keiccu nynh athua. **44** Nanin tuh nae paw satan ccawhae nah thua ohza nae paw rynaw kha nynh zui nah ry oh. Athotakaw kyate anin tuh ccungccattheipaw thuaza bacding kya a pa boyleipaw nynh athua, pawccecize a lungkhu bacding nynh uk khy. Anin nynh hyngbya a hovaeze amaw athuanawpaw a zuipaw nynh athua, pawccecize anin tuh a hyngtupaw thuaza hyngbyahae paw nynh athua. **45** Thuasalama kae tuh bacding ka hoza tukeiccuze nanin nynh nae zyn ry khyh oh. **46** Nanin laku kya seinaw na rae cite nae phy kholang ohpaw lukheit sang nah um oh tou? Bacding ka ho pite pawccemou nae zyn ry khyh oh? **47** Pachia kyate oun thuapaw nynh tuh Pachia bya kha a ngae. Thuasalama nanin tuh Pachia kyate oun thuapaw nah thuakhyh oh keiccuze a bya tuh nah ngaerylang khyh oh,” a ci.

Jesuh Te Abraham

48 Mimin nynh Jesuh kha, “Nang tuh Samariapaw na thuaza na lungkhu kya satan a um, cite kae civaeze akyhpaw kae ho khyh tou?” ah ci hae. **49** Jesuh nynh, “Satan ka hoi khy, kae ka Paw tuh minhooynaw ka pya, thuasalama nanin nynh kae kha minhooynaw nae pya khyh oh. **50** Kamaw hanlang minhooynaw ka ccung khy. Thuasalama minhooynaw a ccungtu lukheit umza amaw nynh kamaw maehooynawlangte bya a pia. **51** Baccacking kae hopya oh: humzema ka ccanpyanaw a zuipaw tuh chiboyvaelang khy,” a ci. **52** Mimin nynh Jesuh kyakhe, “Atu kyalya hynh nynh satan na hoi ci paw hou kae ny ccacding! Abraham ma a chivae; te

profethae ma ah chivae hae, na ci. **53** Kae paw Abraham tuh a chivae; Abraham laeze a leehualangte tou na tuaku? Te profethae ma ah chivae hae, hum nynh ka thua cite mou nah tuaku?” ah ci hae. **54** Jesuh nynh, “Kamaw minhooynaw ka ccung athua langze tuh e minhooynaw tuh ame unglang khy. Kae min oun hooysatu tuh ka Paw thuaza kae Pachia nynh athua nah ci ohpaw ccacci hynh nynh athua. **55** Nanin nynh tuh nah nyh boy khyh oh, thuasalama kae nynh tuh ka ny. Amaw tuh ka nyh boy khyh ka ci langze nanin hawte hyngbya hotu nynh ka thua ci. Thuasalama amaw tuh ka nyza a bya kha ka zui. **56** Nae paw Abraham tuh kae thuanawlangpaw ccyh myarya a ngaehoi; tuh e tuh muiza a lung myarya tua,” a ci. **57** Mimin nynh, “Kum sungpangaw sangma na cih leipite pawtemou Abraham tuh nah mui?” ah ci hae. **58** Jesuh nynh, “Baccacking kae hopya oh: Abraham a pui mawze ka lah umvae,” a ci. **59** Tuinte lunghae kha khuin haeza dehlang ah paccyngnuakuh hae, thuasalama Jesuh tuh rekuza Beikinn kyate a pou.

Jesuh Nynh A Puikhaepaw Mitzupaw A Dang Sa

9:1 Jesuh nynh tucite a ccia lyakhe a puikhaepaw mitzupaw lukheit a mui. **2** A zuituhae nynh, “Saya, hum seinaw keiccu mou mitzute a pui? Amaw seinaw keiccu tou, a nungpawhae seinaw keiccu tou?” cite ah khia hae. **3** Jesuh nynh, “A mit a zupaw tuh amaw seinaw keiccu ma thuakhy, a nungpawhae seinaw keiccu ma thuakhy. Pachia huhan cyi khonaw hynh e paw dangsanaw kyate alangkunaw elang a mit a zunawpaw tuh athua. **4** Ninthu athua lungkhu tuh oun shawtupaw ryalaw laaw hahe aho, hum ccungccaw zema ah laaw kho khyh hae ccyh khuazi tuh oun thua lyaccya. **5** Laephivaw ka um nin lungkhu tuh kae hyn laephi hanlang awnaw nynh ka thua,” a ci. **6** Tute a ho koute Jesuh nynh laephi kya a tuin thoiza laenoi a ciasah koute tuh e paw mit kya a noi. **7** Te thoza, “Lah cceih la Siloam Kuua kya na maee kha lah laku,” a ci. (Siloam suilan tuh “Shaw” ci paw nynh athua.) Tukeiccuze tuh e paw nynh cceiza a maee kha a lawku, te ngawmuite a ki. **8** A innpawhae te tuh mawze looh ngiakute a um lyaze a muihaepaw nynh, “Hynh e paw hyn dahunglangte phua a ngiakutupaw kha

thuakhyh tou?” ah ci hae. **9** Abang nynh, “Amaw hynh nynh athua,” ah ci hae. Miccanghae nynh, “Amaw thuakhy, amaw hawpaw miccangpaw nynh athua,” ah ci hae. Tukeiccuze amaw ccacci nynh, “Nah ho ohpaw kha nynh ka thua,” a ci. **10** Mimin nynh, “Pawtemou atu kya ngaw na muih kho?” cite ah khia hae. **11** Anin nynh, “Jesuh ah cihaepaw nynh tindae pytari raeza ka mit kya oun noi koute Siloam lang lah cceih la na maee lah laku oun ci. A ci hawte ka cceiza ka lakuh miakawte ngaw ka muih kho,” a ci. **12** Mimin nynh, “Tuh e paw tuh teisangmou a um?” ah ci hae. Anin nynh, “Ka nyh khy,” a ci.

Farasihae Nynh A Dangsanawpaw Kong Ah Khiarysyh Hae

13 Tukoute mimin nynh a mit a mohboypaw kha Farasihae kalan oun cciakhae hae. **14** Jesuh nynh tindae raeza a mitzupaw a dangsanaw nin tuh Sabbath nin nynh athua. **15** Farasihae nynh a mit ngaw a muih khonawpaw kong ah khia ki hae. Anin nynh, “Ka mit kya tindae oun noiza ka maee ka lakute ka muih kho,” a ci. **16** Abang Farasihae nynh, “Hyncihaw uccaw a raetupaw tuh Pachia kyate oun thuapaw thualang khy, pawccecize Sabbath phung zui khy,” ah ci hae. Miccanghae nynh, “Misei athua langze hyncihaw ngae-annawhae pawtemou a rae kho ci?,” ah ci hae. Te mimin kya hophiakunaw a um. **17** Tukeiccuze Farasihae nynh tuh e paw kha bua khialia ki haeza, “Na mit ae dangsatupaw hyn hummou thuaza ae dangsatupaw hyn pawte na tua?” ah ci hae. Tuh e paw nynh, “Profet nynh athua,” a ci. **18** Judah kawhoituhae nynh mitzupaw konglang kha a nungpawhae ah khia mawlae hae cia mitzute a puipaw nah ci oh; athuaze pawtemou atukya ngaw a muih kho?” ah ci hae. **19** Te mimin kha ko haeza, “Hynh e paw hyn nae ccapaw nynh athua ci paw ah ny oh, te mitzute a puipaw ci paw ma nah ny oh. **21** Thuasalama pawtepei atukya ngaw a muih kho ci paw te a mitzupaw hyn hum nynh a dangsah ci paw zema kae nyh khy. Amaw khia tua oh; piccan thua buavaeza amaw nynh ae let kho cih oh!” ah ci hae. **22** Judah kawhoituhae nynh lungccinnaw ah

hoihaepaw tuh: humzema Jesuh hyn Messiah nynh athua cite ka zyn cipaw miakaw tuh sinakok kyate dei thuasa, cihaepaw kha a nungpawhae nynh ah rhi hae keiccuze tute ah ho hae. **23** Tukeiccuze a nungpawhae nynh, “Piccan thuavaeza amaw kha khia oh!” ah cinawhaepaw tuh athua. **24** Avaeninnaw mitzute a puipaw tuh ko ki haeza anin kyakhe, “Baccing ka ho cih cite Pachia malang bya kinkuh! Ae dangsatupaw hyn misei nynh athua ci paw kae ny,” ah ci hae. **25** Tuh e paw nynh, “Misei athua te athuakhyh ka nyh khy, ccankheit tuh ka ny: ka mit azu, te atu ngaw ka mui,” a ci. **26** Mimin nynh, “Pawtemou ae cyi? Na mit azunaw tuh pawtemou ae dang sa?” ah ci hae. **27** Anin nynh, “Kae hopyavae ohpaw nah ngaery khyh oh. Pawccemou thaethui nah ry ki oh? Nanin zema amaw zuitulang tang nah ryvae oh ma?” a ci. **28** Mimin nynh anin kha sarya haeza, “Namaw palia hynh nynh tuh e paw zuitu nah thua ngaw; thuasalama kaenin tuh Moses zuitu nynh kae thua. **29** Pachia nynh Moses kya bya a ho, ci kae ny; thuasalama tuh e paw tuh paw kyate nynh oun thua ci paw sangma kae nyh khy!” ah ci hae. **30** Anin nynh, “Pawcibang ngae-anlang a ung! Nanin nynh tuh paw kyate nynh oun thua ci paw nah nyh khyh oh, thuasalama kae tuh ka mitzupaw oun dang sa! **31** Pachia nynh miseihae bya ngae boy khyh ci paw kae ny; thuasalama amaw sawtuatuhae te a rynaw a raetuhae bya tuh a ngae. **32** Laephi thotakawte puikhae mitzu ccungccaw kha lukhakheit nynh a dang sa, ci paw hum nynh sangma thae boylang khy. **33** Hynh e paw hyn Pachia kyate oun thualeipaw langze pawsangma rae khonaw hoilang khy,” a ci. **34** Mimin nynh, “Seinaw lungkhu kya na puiza seinaw kyate oun leethungpaw nang nynh tou kaenin ccanpyalangte nae nouukuh,” cih haeza sinakok kyate ah dei hae.

Muisaw Mitzunaw

35 Tucite acyikupaw kha Jesuh nynh a thaete tuh e paw kha muiza, “Ccungccaw Ccapaw hyn na zyn tou?” a ci. **36** Ccungccapaw nynh, “Bawipaw, tuh e paw tuh hummou athua; amaw tuh ka zyn khonawlang oun hopya tua!” a ci. **37** Jesuh nynh, “Amaw tuh na muivaeza atuze ae

beik lyaccyapaw hynh nynh athua,” a ci. **38** Jesuh nynh, “Bawipaw, ka zyn!” a cite Jesuh malang a bakhung. **39** Jesuh nynh, “Hynh e laephi kalan byapiyalang nynh kae thua, tukeiccuze mitzupaw ngaw ah muinawlang hae te ngawmuihaepaw mitzunawlang nynh athua,” a ci. **40** Tuinkya umhaepaw abang Farasihae nynh tucite a hopaw kha ah thaehaepawte, “Nanin hynh zema mitzute a puihaepaw nynh nah thua bua oh, nae ci rypaw ccacking thuakhyh zaw?” ah ci hae. **41** Jesuh nynh, “Mitzupaw lah thua oh laze seiphusah nah thualang khyh oh; thuasalama ngaw kae muih kho nah ci oh keiccu hyn seiphusah nah thua ohza nae seinaw tuh a um ung,” a ci.

Tuurintu Tousenaw

10:1 Jesuh nynh, “Baccacking kae hopya oh: tuu khiaa lungkhu lang sakuih kyate teelete hmin ccanglangte kaeza a teepaw tuh miruh te damiah nynh athua. **2** Sakuih kyate a teetu tuh tuuhae a rintu nynh athua. **3** Sakuihngawtupaw nynh a hanlang sakuih a hong pya. A tuuhae tuh mih minte kote a roy kha thae haeza atolang a poukhae hae. **4** Tute tuuhae a poukhae hae te mih malang cciapah haeza a tuuhae nynh ah zui hae, pawccecize a roy kha ah ny hae. **5** Miccanghae tuh zuiboy khyh hae; pawccecize a roy kha a ny khyh hae keiccuze a kyate ah ccawe paleh cih hae,” cite a ci. **6** Jesuh nynh hynh e tousenaw hyn a hopya hae, thuasalama a horynawpaw nyh khyh hae.

Tuurin Hooy Jesuh

7 Jesuh nynh thokiza, “Baccacking kae hopya oh: kae tuh tuu teenaw sakuih nynh ka thua. **8** Kae mawze a thuatyhaepaw balyn tuh miruhae te damiahae nynh ah thua hae, thuasalama tuuhae nynh mih kaw ngae khyh hae. **9** Kae tuh sakuih nynh ka thua. Humzema ka kyate a teepaw tuh ah khyng cih hae; ah tee ah pou cih haeza a hiinpaw lonua kha ah muih cih hae. **10** Miruh tuh rulang, chialang te rolang kyalya nynh oun thua. Kae tuh hiinnaw mawe haeza hiincungccingnaw ah mawenaw hae elang nynh

kae thua. **11** “Kae tuh tuurin hooyipaw ka thuaza tuuhae elang hiinnaw a pyapaw nynh ka thua. **12** Tuurintu a thualeipaw, tuu a hoi boyleipaw te amete hohpaw nynh tuh suizaw oun thuapaw kha a muite tuuhae kha cciatawza a cca wetaw hae; tukeiccuze tuuhae kha tiza mimin kha a phia hae. **13** Amete hohpaw tuh a cca we, pawccecize amete nawpaw thuaza tuuhae kha thawccih khy. **14 -15** Kae tuh tuurin hooy nynh ka thua. Ka Paw nynh oun ny hawte kae nynh Paw kha ka ny, tuhawte ka tuuhae kha ka nyh haeza mimin nynh ma oun ny hae. Te mimin hanlang ka hiinnaw ka sya ry. **16** Hynh e tuuzaw kya a paleipaw ka uccaw athuapaw ccangpaw tuu ka hoi. Mimin zema ka soilua bua hahe cih hae; ka roy kha oun ngae cih haeza tuurin lukheit zakaw tuuzaw ccankheitlang oun tang cih hae. **17** “Paw nynh oun sungsa, pawccecize ka hiinnaw lungthote ka pya ry; tute ka pya rynawpaw tuh bua ka mawe thyanawlang nynh athua. **18** Ka hiinnaw tuh hum nynh sangma ka kyate lak kholang khyh hae. Kamaw nynh hysanawte ka pyapaw nynh athua. Kamaw nynh pyanaw kaw ka hoiza laawthuinaw kaw ma ka hoi. Tuh e tuh ka laawlangpaw ka Paw nynh kaw oun pyapaw nynh athua,” a ci. **19** Hynh e byahae keiccuze ccung-ccawhae tuh mih tuanaw bua a phiaku. **20** Ccungccaw patae nynh, “Satan nynh a hoi! A ngae evae! Pawcce a bya nah ngae oh?” ah ci hae. **21** Thuasalama miccanghae nynh, “Satan hoipaw nynh tuh hynhawte ho thyalang khy! Pawtemou satan hoipaw nynh tuh mitzupaw kha a dangsah thya ci?” ah ci hae.

Jesuh Ah Vua Hae

22 Khoccih ccyh ninkhe Beikinn Apnaw Poy kha Jerusalem khua kya ah tua cci amang hae. **23** Beikinn lungkhu Solomon Maepaw ci paw kya Jesuh tuh a ccia lyakhe, **24** Judahae nynh oun koylui haeza, “Hotuh ciamou kae ngae a-ihte nae naung ung ci? Baccингpaw oun hopya tua: Messiah na thua tou?” ah ci hae. **25** Jesuh nynh, “Kae hopyavae ohpaw, thuasalama nae zyn khyh oh. Ka Paw kawte ka raepaw uccawhae nynh ka konglang balyn tuh ah langsakuvae hae khaw; **26** thuasalama nae zyn khyh oh, pawccecize ka tuuhae nah thuakhyh oh. **27** Ka tuuhae nynh ka roy kha

ah ngae hae, mimin kha ka nyh haeza mimin nynh oun zui hae. **28** Mih kya zungzae hiinnaw ka pya haeza paping chivaelang khyh hae. Hum nynh sangma ka kyate oun lua kholang khyh hae. **29** Ka kalan oun pyatupaw ka Paw tuh pawpaw balyn laeze leehuaza amaw rinnaw lungkhu kyate hum nynh sangma oun lua kholang khyh hae. **30** Ka Paw te kae tuh lukheit nynh kae thua,” a ci. **31** Te Judahae nynh amaw dehnaw-lang lung tuh bua ah khuinku ki hae. **32** Jesuh nynh mimin kyakhe, “Nae mitmuinaw kya ka Paw nynh raelangte oun nawpaw uccahoopaw miakaw tuh nae kyakhe ka raevae; paw nae hua oh keiccu mou lungte dehlang nae ry oh?” a ci, **33** Mimin nynh, “Lungte dehlang kae rynawpaw tuh uccahoopaw na raepaw keiccu thuakhy, Pachia na sarya keiccu nynh athua! Nang tuh ccungccahuataw nynh na thua, thuasalama Pachia tuhlangte raekulang na zuaku!” ah ci hae. **34** Jesuh nynh, “Nae Kawbya cca-uk kya Pachia nynh, ‘Nanin tuh pachiahae nynh nah thua oh,’ a ci cite zeipaw a um. **35** Ccathya nynh hopaw tuh zungzaete ahmepaw nynh athua ci paw kha ah ny oh; te Pachia nynh a bya a pyahaepaw khaw tou ‘pachiahae,’ cite a ko hae. **36** Kae tuh ka Paw nynh popaw te laevaw lang oun shawpaw nynh ka thua. Tute athua keiccuze Pachia Ccapaw nynh ka thua ka ci keiccuze kae hyn Pachia a saryatu nynh athua nae ci thya oh? **37** Ka Paw nynh ryleipaw uccaw ka rae athua langze oun zyn nang oh. **38** Thuasalama ka rae athua langze kae nae zyn ry khyh oh zema ka raepaw sangkaw tuh nah zynlang ohpaw nynh athua; tuteze nynh Paw tuh ka lungkhu kya umza Paw lungkhu kya ma kae ka um ci paw nah zyn zungzaenawlang oh nynh athua,” a ci. **39** Kynglangte ah paccyngkuh ki hae, thuasalama zya a zutaw hae. **40** Jesuh tuh Jordan Vaw khurawlang, Johan nynh baptisma a lah pyanaw hmin kalan cceih kiza tuinkya a um. **41** Ccungccaw patae nynh a kalankhe oun cceih haeza, “Johan nynh ngae-annaw pawsangma rae khy, thuasalama hynh e paw konglang a hopaw tuh marya hme kou,” ah ci hae. **42** Te tuinkya amaw kha ccungccaw patae nynh ah zyn hae.

Lazaras Chinaw

11:1 Bethany khua kya a umpaw Lazaras ah cihaepaw lukheit tuh a cci.

Bethany tuh Mary te a u Martha ah umnaw hae khua nynh athua. (**2** Hynh e Mary tuh Bawipaw ccu kya zimuin buza a saante a hutunung nynh athua. A ccipaw Lazaras tuh a raeepaw nynh athua.) **3** Mih uccawte Jesuh kalankhe bya taw haeza, “Bawipaw, na sungsapaw na banpaw a ccih,” ah ci pya hae. **4** Tuh e kha Jesuh nynh a thaete, “Hynh e a ccinaw tuh Lazaras chinaw ciate ccinaw thuakhy; hynte acyikupaw tuh Pachia phu-enaw alangkunaw elang te Pachia Ccapaw nynh phu-enaw ccounaw elang nynh athua,” a ci. **5** Jesuh nynh Martha te a netaw te Lazaras kha myarya a sungsah hae. **6** Lazaras a ccinawpaw the a thae koute tuin a umnaw kyakhe alaelangte nin nin a um ung. **7** Tukoute a zuituhae kyakhe, “Judea lang cceih ki oh si,” a ci. **8** A zuituhae nynh, “Saya, ah nulang lyaze tuinkya ccungccawhae nynh lungte dehlang ae ci hae khaw; cciakilangte tou bua na paccyngku?” ah ci hae. **9** Jesuh nynh, “Ninkheit kya suimilan laenin a um thuakhyh tou? Tukeiccuze humzema ninthu awnaw kya a cceipaw tuh thykuh boy khyh hae, pawccecize hynh e laephi awnaw kha a mui. **10** Thuasalama khuazi ccyh khe a ccialangze a thyku, pawccecize awnaw hoi khy,” a ci. **11** Jesuh nynh tuh e a ho koute, “Ah banpaw Lazaras tuh marya a ithehvae, thuasalama ka cceih ciza ka lah thoo ci,” a ci. **12** Zuituhae nynh, “Bawipaw, a it athua langze oun dang ci,” ah ci hae. **13** Jesuh nynh a horynawpaw tuh La-zaras a chivae a cirynawpaw, thuasala-ma mimin nynh it huatawpawlangte ah tua hae. **14** Tukeiccuze Jesuh nynh ccaerarilangte hopah haeza, “Lazaras tuh pheh chivae; **15** thuasalama a kya ka lah umleipaw tuh nanin hanlang ka lung myarya tua, pawccecize nae zyn cih oh. A kalankhe cceih oh si. **16** Thomas (Ccaphei ah cihaepaw) nynh a zuituhae kyakhe, “Sayapaw ryte chi kheih khylang cceih oh si!” a ci.

Jesuh Tuh Thoothuinaw Te Hiinnaw

17 Jesuh a thua tuh Lazaras ah unaw hae te ninpalei acivae. **18** Bethany tuh Jerusalem te mengnin acileipaw thuaza, **19** Judahae patae tuh mih raeepaw nynh chitawhaepaw Martha te Mary ngaethyakhae khylang oun cceih hae. **20** Jesuh oun cceih cciamang ci paw Martha nynh a thaete

amaw doyhaw khylang a cceih, thuasalama Mary tuh innvaw nynh a um.

21 Martha nynh Jesuh kyakhe, “Bawipaw, heinkya lah um laze kae raeepaw hyn a chih ci-leipaw! **22** Thuasalama atu hynzema na ngiapaw tuh Pachia nynh ae pya cih ci kha ka ny,” a ci. **23** Jesuh nynh, “Nae raeepaw tuh a hiinthui ci,” cite a ci. **24** Martha nynh, “Nin tha nin kya tuh a thoothui cih ci paw tuh ka ny,” cite a let. **25** Jesuh nynh a kyakhe, “Kae hyn thoothuinaw te hiinnaw nynh ka thua. Humzema kae oun zyntu tuh chih salazema a hiin ci. **26** Humzema ka lungkhu kya a hiinpaw te oun zyntu tuh chivaelang khyh hae. Hynh e hyn na zyn ta?” a ci. **27** Martha nynh, “Athua Bawipaw, nang tuh laevaw lang oun thualangpaw Pachia Ccapaw Messiah nynh na thua ci kha kae zyn,” a ci.

Jesuh A Rah

28 Martha nynh hynh e balyn a ho koute kiza arulangte Mary kha a ko. “Sayapaw heinkya umza ae peki,” a ci. **29** Tuh e kha Mary nynh a thaete thokuza doyhawlang arangte a ccei. (**30** Jesuh tuh kholae kya thua loh khy; Martha te ah tongkunaw hae kya nynh a um ung.) **31** Mary ngaethyakhaetuhae tuh Mary a thokupaw te arangte a cciapaw kha ah muih hae tuh amaw kha ah zui hae. Ssaw kalan rawlang nynh a ccia ngaw cite ah tua hae. **32** Jesuh umnaw kyakhe Mary tuh lah thuaza Jesuh a muih miakawte a cculeipaw khe bakhungza, “Bawipaw, heinkya lah um laze ka raeepaw tuh chilang khy!” a ci. **33** Jesuh nynh Mary a rawpaw te ngae a thyakhaetuhae ah rawhaepaw kha a muite a thinlung myarya cciza a thinlung a kuai. **34** Pawkyamou nah u oh?” cite a khia hae. Mimin nynh, “Bawipaw, oun cceih la oun do tua,” ah ci hae. **35** Jesuh tuh a rah. **36** Ccungccawhae nynh, “Lazaras tuh myarya a lah sungsah i!” ah ci hae. **37** Thuasalama abang ccungccaw nynh, “Mitmohpaw ngaw a muih sa, thuakhyh zaw? Lazaras hyn chileite pawtemou a rae bua khy?” ah ci hae.

Lazaras A Hiin Thui

38 Jesuh tuh a thinlung myarya bua ccih kiza ssaw kalan a ccei. Tuh e

ssaw tuh lungkarung thuaza athuhfulang lungphe phekheit ah fu hae. **39** Jesuh nynh, “Athuhfu hyn nawe oh,” cite kaw a pya hae. Michipaw ccianung Martha nynh, “Bawipaw, a mynvae ngaw. Kae unawte ninpalei acivae!” a ci. **40** Jesuh nynh a kyakhe, “Na zyn ccaccing athuaze tuh Pachia phu-enaw na muih ci, cite kae hopya thuakhyh zaw?” a ci. **41** Te a thuhfu kha ah nawe hae. Jesuh nynh vaaw lang dote, “Ka Paw, ka hopaw nae ngaepya keiccuze kae luung. **42** Ka bya zungzae nae thaepya ci paw ka ny, thuasalama heinkya a umhaepaw nynh namaw shawpaw ci paw oun zyn thyanawlang hae mimin keiccuze hyncite kae hopyanawpaw tuh athua,” a ci. **43** Tucite a ho koute roy pheh ccaethelangte, “Lazaras, oun pou!” cite a sia. **44** Lazaras tuh a kuit a ccu boeite ah launghaepawte a maee ah khung hae thyte oun pou. Jesuh nynh phoupah ohla cceih sa!” a si.

Jesuh Ah Phenaw Hae

45 Mary ngaethyakhaelang oun thuahaepaw ccungccaw patae nynh Jesuh a raepaw kha ah muih hae, te amaw kha ah zyn hae. **46** Thuasalama abang nynh Farasihae kalan ki haeza Jesuh nynh a raepaw balyn kha ah hopya hae. **47** Tukeiccuze Farasihae te silawtu piccanhae tuh Khonsilhae ryte tongkuh haeza, “Pawtemou ah cyih cih oh? Hynh e paw nynh ngae-annaw balyn a raepaw hyn dotua oh! **48** Hyncite ah sawbialang ohze ccungccaw balyn nynh amaw kha oun zyn cih haeza Rom kawhoituhae nynh seiphusate ah Beikinn te ah miphuin oun ro cih hae,” ah ci hae. **49** Mih laku kya e lukheit, Kaifafas ah cihaepaw, tuin kum kya Silawte Lupi a latu nynh, “Myarya nah ngatee oh il! **50** Ccungccaw pataepi zakanglang ccungccaw lukheit chi tuh miphuin pynpi marya a ro lae tuh ahooyhua ci paw nah nyh khyh oh tou?” a ci. **51** Accaccing cilangze tucite a hopaw tuh amaw kyalyate a hopaw thuakhy; tuin kum tuh amaw kha Silawtu Lupi athua thyhawte Judah miphuin ccaanlang Jesuh tuh a chih ci, cite profet hawte a lah hotypaw nynh athua. **52** A chinaw tuh mimaw hanlang kyalya thualeite a phiakuvaehaepaw Pachia ccungccawhae pyngkheilang soiluakunawlang zema athua bia. **53** Tuin nin kyate Judah Kawhoituhae

tuh Jesuh chianawlangpaw khua ah khangkuh hae. **54** Tukeiccuze Judea pee lungkhu Jesuh tuh alangkulangte khuaccongvaе khy; tuin kyate toykuza laesiaram pe kya umpaw Efraim ah cihaepaw khua lang cceiza tuinkya a zuituhae ryte ah um hae. **55** Pongpou Poy ccyh tuh naevaeza ccungccaw patae tuh poy tua mawkya thyasakunaw raeku khylang khotaraw kyate Jerusalem lang ah cceih hae. **56** Mimin nynh Jesuh tuh ccung haeza Beikinn kya ah pumku lya hae khe lukheit te lukheit kha, “Pawte na tua? Poy kalan tuh oun thua ccaccing ngaw tou?” ah cikuh hae. **57** Silawtu piccanhae te Farasihae nynh Jesuh umnaw a nytu nah um oh langze kae kyng thyanawlang nae hopah cih oh, cite ah thaesah hae.

Jesuh Tuh Bethany Kya Zimuin Ah Bu Hae

12:1 Pongpou maw nintaruh kya Jesuh tuh Bethany kya chinaw kyate a thoosapaw Lazaras hae inn lang a ccei. **2** Tuinkya a hanlang zerya paccyng haeza Martha nynh a do-oyh. Jesuh ryte looh a ae kheihaepaw laku kya Lazaras ma a pang bua. **3** Tuinte Mary nynh Nard phite raepaw aphiuin ahooypaw te ame rhupaw zimuin bukheit lakza Jesuh ccu kya a bu koute a saante a hu. Tuh e zimuin myng tuh inn lungkhu pheh beih. **4** Jesuh zuituhae lakuze lukheit, amaw a phetulangpaw Judas Iskariot nynh, **5** “Pawccemou hynh e zimuin tuh phua zathumlang zuate tuh e phua tuh ryachihae ah nei paleh khyh hae?” a ci. **6** Hynte a hovaeze ryachihae kung a rua keiccu thuakhy; miruh athua keiccu nynh athuahua. Phohbu kha amaw nynh ccyngza tuh e phua tuh amaw hanlang nynh a mang. **7** Thuasalama Jesuh nynh, “Hynh e nung hyn nongphusah nang oh! Ka ruan u nin hanlang a raelangpaw tuh rae sa. **8** Nae laku kya ryachihae tuh ah lah um zungzae cih hae; thuasalama kae tuh nae laku kya ka um zungzaelang khy,” a ci.

Lazaras Chialang Ah Paccynku Hae

9 Ccungccaw patae nynh Bethany kya Jesuh a um ci paw ah thae hae te tuin kalan cceih haeza Jesuh muih ry kyalya thualeite Jesuh nynh chinaw

kyate a thoosapaw Lazaras muih ry khylang nynh ah ccia hae. **10**
Tukeiccuze silawtu piccanhae nynh Lazaras khazema chialangte ah
paccyngku hae. **11** Pawccecize Judahae patae nynh Lazaras keiccuze
silawtu piccanhae kha vua haeza Jesuh kha ah zyn hae keiccu nynh athua.

Phu-enawte Jerusalem Lang Teenaw

12 Amuakaw kya Pongpou Poy kalan oun cceihapaw mibuupi nynh Jesuh
tuh Jerusalem lang a cceih cih ci paw kha ah thae hae. **13** Tukeiccuze
nuaanaw kha khyakute amaw doyhawlang cceih haeza, “Pachia tuh
thehoysah oh! Bawipaw minte oun thuapaw tuh Pachia nynh hythuanaw
pya sa! Pachia nynh Israel Siangpahrang tuh hythua pya sa!” cite ah sia
hae. **14** Jesuh nynh lantaraw kha muiza a cciku; ccathya nynh, **15** “Zion
khopi rhih nang; na siangpahrang tuh lantaraw oun ccikuza oun thua
lyacca,” a ci paw thyhawte accin. **16** A zuituhae nynh hynh e ccyh lya e
bya nynh a horypaw lah nyh khyh hae. Thuasalama Jesuh kha phu-enaw
kalan thoosah oun thuate tuh amaw konglang kya hyn ccathya nynh
hynhawte lah hoza amaw hanlang nynh hynhawte ah rae hae ci paw kha
oun liaathui hae. **17** Jesuh nynh Lazaras ssaw kyate po poulang koza
chinaw kyate a thoosah lyaze alah muih bua haepaw ccungccaw patae
nynh tuh e kong kha ah hopathy hae. **18** Tucihawpaw ngae-annaw a rae ci
paw kha ah thae hae keiccuze mibuupi nynh ah doyhawnawhaepaw tuh
athua. **19** Tuinte Farasihae nynh, “Ah cih khyh oh tou, ah cih khovaelang
khyh oh! Dotua oh, laephi pynpi nynh ah zuivae hae khoh sa!” cite lukheit
te lukheit kha ah diakuh hae.

Abang Grikhae Nynh Jesuh Ah Ccung Hae

20 Tuh e poy kya Pachia beik khylang Jerusalem lang oun cceihapaw
laku kya Grikhae ma ah pang bua hae. **21** Filip kalan cceih haeza, “Saya,
Jesuh muih kae ry,” ah ci hae. (Filip tuh Galilee pee Bethsaida khuapaw
nynh athua.) **22** Filip nynh Andru kalan cceiza a hopya, te mih luninte
cceih haeza Jesuh kha ah hopya hae. **23** Jesuh nynh mih kyakhe,

“Ccungccaw Ccapaw nynh phu-enaw aleepi a mawenaw ccyh oun thuavae. **24** Baccaccing kae hopya oh: ccatan pyngkheit tuh laephi kya tute a chi khyh langze amaw thathyte nynh a um ci. A chih koute nynh ccatan pynhae patae a pousah kho. **25** Humzema a hiinnaw a sungsatu tuh a hiinnaw a zo ci; humzema hynh e laephivaw a hiinnaw a huatu tuh zungzae hiinnaw hanlang a hiinnaw kha a ccykuvae. **26** Humzema kae ryaa oun rytu tuh kae kha oun zui hahe ci, kae oun ryaatu tuh ka umnaw kyakhe a um bua ci. Te humzema kae oun ryaatu tuh ka Paw nynh minhoynaw a pya ci.

Jesuh Nynh A Chinawlangpaw Kong A Ho

27 “Ka lung vaw kou saw; pawte ka ho ci? ‘Ka Paw, hynh e ccyh hyn ka tungvaw kya ccawsah nang,’ ka cih citou? Thuasalama hynh e te-ingnaw lungkhu tee khylang khe kae thua! **28** Ka Paw, na min tuh phu-enaw pya tua!” a ci. Tuinte vaaw langte roy oun ccaeza, “Phu-enaw tuh ka pyavaeza bua ka pya ki ung ci,” a ci. **29** Tuinkya a thadynhaepaw mibuupi nynh roy tuh thae haeza, “Abang nynh kholon,” te miccanghae nynh, “Vaawpaw nynh bya a ho!” ah ci hae. **30** Thuasalama Jesuh nynh mimin kyakhe, “Hynh e roy nynh a hopaw hyn ka hanlang thuakhy, nanin hanlang nynh athua. **31** Hynh e laephi hyn atu tuh byapia ccyh accinvae; hynh e laephi uktu tuh atu kya dei athua ci. **32** Laephi kyate saee kae thuate ccungccaw balyn ka kalan kae dawng cih hae,” a ci. **33** (Hynte a hovaeze pawcihawpaw chinaw mou ka ing cih ci paw kha a langsakunawpaw nynh athua.) **34** Mibuupi nynh, “Ah Kawbya nynh Messiah tuh zungzae a hiin ci, cite oun hopya. Tute athuaze pawtemou Ccungccaw Ccapaw tuh saee athua cih cite nang nynh na ci? Ccungccaw Ccapaw tuh hummou?” ah ci hae. **35** Jesuh nynh, “Awnaw tuh nae kya ccyh dyngtari lungkhu a um ung ci. Awnaw nah hoi lya oh lungkhu kya mohnaw nynh ae ccawnuia leinawlang oh nah ccianaw oh laanpi kya tuh cceih hing oh; pawccecize mohnaw kya a cceipaw nynh tuh paw kalan nynh ka ccia ci paw sangma nyh khy. **36** Awnaw nah hoi lya oh lungkhu tuh awnaw ccungccaw nah thuanawlang oh awnaw tuh zyn oh,” a ci.

A Zynleipaw Ccungccawhae

Tuh e a ho koute Jesuh tuh pouza mih kyate a reku. **37** Mih mitmuinaw kya ngae-annaw patae a rae pite amaw kha zyn khyh hae. **38** Tuh e tuh profet Isaiah nynh: “Bawipaw, kae hopaw bya tuh hum nynh mou a zyn? Hum kyamou Bawipaw nynh a huhan tuh a langsaku?” cite a ci paw accingnawlang nynh athua. **39** Tukeiccuze ah zyn kholeinawhae-paw tuh thuaza, Isaiah nynh ma: **40** “Pachia nynh mih mit mohsah haeza mih thinlung a pingsah hae. Tute athuakhyh langze mih mit nynh ngaw oun muih sei ngawza, mih thinlung nynh oun nyh sei ci; ka kalan oun ki sei cih haeza, kae dangsah sei cih hae, Pachia nynh a ci,” cite a lah ho ki. **41** Isaiah nynh hynte a honawpaw tuh Jesuh a phu-enaw kha pheh lah muih tyvaeza a konglang zema a lah hovae keiccu nynh athua. **42** Tute athuapite Judah kawhoituhae patae nynh Jesuh tuh ah zyn hae; thuasalama Farasihae nynh sinakok kyate oun dei sei cih hae ci paw keiccuze Jesuh ah zynnaw hae konglang kha alangkulangte ho ngang khyh hae. **43** Pachia malang maehooynaw laeze ccungccaw malang maehooynaw ah ryhua hae.

Jesuh Byahaete Byapianaw

44 Jesuh nynh roy pheh ccaethelangte, “Humzema kae oun zynpaw tuh kae kyalya kha oun zyn khyza oun shawtupaw khazema a zyn bia. **45** Humzema kae oun muitupaw tuh oun shawtupaw khazema a muih bua. **46** Humzema kae oun zynpaw miakaw nynh mohnaw lungkhu ah um khyhnawlang hae hynh e laephivaw kya awnawte kae thuavae. **47** Humzema ka byahopaw thaeza a zuileipaw tuh kae nynh bya ka pialang khy. Laephi byapia khylang kae thua khy, khum khylang nynh kae thua. **48** Humzema kae oun vuatu te ka bya a pawmleipaw tuh a bya piatu lukheit ka hoi. Ka hopaw hyn nyathya nin kya a bya piatulang oun tang ci. **49** Hynh e hyn baccacking nynh athua, pawccecize kae kawhoinaw huhante ka hopaw thuakhy, thuasalama oun shawtu ka Paw nynh holangpaw te ccaelangpaw kaw oun oun pyanaw thungte nynh athua. **50** Te hynh e kawpyanaw tuh zungzae hiinnaw nynh athua ci kha ka ny.

Tukeiccuze ka hopaw hyn ka Paw nynh holangte oun ci pyapaw nynh athua,” a ci.

Jesuh Nynh A Zuituhae Ccu Singnaw

13:1 Atu tuh Pongpou Poy maw e nin kha nynh athua. Jesuh nynh hynh e laephi cciatawte a Paw kalan ccianaw ccyh oun thuavae ci kha a ny. Laephivaw a umhaepaw ccungccawhae kha sungsah haeza athanaw cia a sungsah zungzae hae. **2** Jesuh te a zuituhae tuh zerya ah mangkheih hae. Satan nynh Jesuh phenawlangpaw tuanaw kha Simon Iskariot ccapaw Judas thinlung lungkhu kya a lah sangvae. **3** Ka Paw nynh accinpaw huhan balyn ae pyavae ci paw kha Jesuh nynh a ny; Pachia kyate kae thuaza Pachia kalan ka cceih ki cih ci paw kha a ny. **4** Tukeiccuze ccaboy kyate oun thokuza a angkilee kha a khaku, te a pavua kha a tae kya a voiku. **5** Tukoute pakepi kya tui a ccae koute zuituhae ccu kha sing haeza a tae kya a voikupaw pavuate a hu hae. **6** Simon Peter kya a thuate anin nynh, “Bawipaw, ka ccu tuh nae sing sasaw cih tou?” a ci. **7** Jesuh nynh, “Hynte ka cyipaw tuh atu kya tuh asuilan na nyh loh khy, thuasalama nyalang nae nyh ci,” a ci. **8** Peter nynh, “Ka ccu tuh vangcisezema nae sing paping lang khy!” a ci. Jesuh nynh, “Na ccu hynh kae sing khyh athuaze tuh zuitulang na thua thyavaelang khy,” a ci. **9** Simon Peter nynh, “Bawipaw, tute athua langze ka ccu kyalya hyn oun sing nang! Ka kuithae te ka lu hynh zema oun sing bua a ci,” a ci. **10** Jesuh nynh, “Humzema a singkuvaepaw tuh a pyn balynte thyavaeza a ccu holeite tuh sing a honaw umvae khy. Lukheit holeite tuh nae balynte marya nah thyavae oh. **11** (Jesuh nynh hum hynh nynh oun phe cih ci paw a nytyvae; tukeiccuze, “Nae balynte marya nah thya oh, lukheit holeite tuh,” a cinawpaw tuh athua.) **12** Jesuh nynh mih ccu kha a sing hae koute a angkilee kha kikuza a dahungnaw ccaboy kya a dahung ki. Anin nynh, “Atu nae tungvaw kya ka raepaw kha asuilan nah nyh oh tou?” cite a khia hae. **13** Nanin nynh, ‘Saya, te Bawipaw,’ cite nae ko ohpaw tuh ahmepaw nynh athua, pawccecize nae ko oh hawte ka thua ccacing. **14** Kae nae Bawipaw te nae Sayapaw nynh nae ccu kha kae singvae oh. Tukeiccuze nanin nynh zema lukheit te lukheit nae ccu kha nah

singkuh bua cih oh. **15** Nae hanlang uccaw ka rae thathyh hawte nah raebuanawlang oh nae mitmuinaw kya dosuinkulangte ka raevae. **16** Baccacking kae hopya oh: a zuaapaw laeze a leehuapaw see umboy khy, te shawpaw nynh a shawtu laeze leehua boy khy. **17** Atu hynh e baccacking hyn nah nyvae ohza nah rae ccacclinglang ohze pawcive nae lung atua ngaw! **18** “Nae balyn konglang ka hopaw thuakhy; ka pohaepaw tuh ka ny hae. Thuasalama ccathya nynh, ‘Kae ryte looh pyngkheilang kae pukheipaw nynh oun dou,’ a ci paw tuh accing aho. **19** Hynh e acyiku mawze kae hopah ohza tute oun cyiku ccacchingvaeze ‘Kamaw tuh Kamaw nynh ka thua,’ hyn nae zyn cih oh. **20** Baccacking kae hopya oh: humzema ka shawpaw a ccoutu tuh kae zema oun ccoupaw nynh athua; te kae oun ccoutu tuh oun shawtupaw a ccoutu nynh athua,” a ci.

Jesuh Nynh Ah Phe Cinaw Hae Kong A Ho

21 Tute Jesuh nynh a ho koute a lung vawsawza polangkulangte, “Baccacking kae hopya oh: nae laku kya e lukheit nynh nae phe cih oh,” a ci. **22** Zuituhae tuh lukheit te lukheit kha dokuh haeza a honuathepaw hyn humpei cite lung ung khakhangte ah um hae. **23** Zuituhae lakuze lukheit, Jesuh nynh a sungsapaw tuh Jesuh pekhe a dahung. **24** Simon Peter nynh tuh e paw kha a kuit heepaza, “A honuathepaw kha hummou, khia tua,” a ci. **25** Tukeiccuze zuitupaw nynh Jesuh kha naekuza, “Na honuathepaw kha hummou, Bawipaw?” a ci. **26** Jesuh nynh, “Sanglou hyn pake lungkhu kya kae daung ciza ka pya cipaw hynh nynh athua,” a ci. Tukei-ccuze Jesuh nynh sanglou phekheit lakza a daung koute Simon Iskariot ccapaw Judas kha a pya. **27** Judas nynh sanglou a lawkuh miakawte Satan tuh a lungkhu lang a tee. Jesuh nynh, “Na raelangpaw tuh arangmawte rae ccavae!” a ci. **28** Ccaboy kya a dahunghaepaw hum nynh sangma pawccepei Judas kya tute aho ci paw kha nyh khyh hae. **29** Judas tuh phohbu ccytu athua keiccuze abang zuituhae nynh Jesuh nynh poy hanlang ahopaw relang nynh a naw ngaw, athuakhyze ryachihae kalan uccaw hankhakheit pyalang nynh a naw ngaw cite ah tua hae. **30** Judas nynh sanglou tuh lawkuza vaekheimawte a pou. Tuh ccyh tuh khuazi nynh

athua.

Kawbya Thawpaw

31 Judas a pou koute Jesuh nynh, “Atukya Ccungccaw Ccapaw phu-enaw tuh alangkuvae; atu amaw kyate Pachia phu-enaw tuh alangkuvae. **32** Te amaw kyate Pachia phu-enaw langsaku athua langze Pachia nynh Ccungccaw Ccapaw phu-enaw tuh amaw ccacci kyate a langsakuh bua ciza aromawze a rae ccaccing cipaw nynh athua. **33** Ka ccawhae nae kya saepi ka umvaelang khy. Kae kha nae ccung cih oh; thuasalama Judah kawhoituhae kya ka ho hawte atu nae kya ka ho ki, ‘Ka ccianaw lang nah cceih kholang khyh oh! **34** Te atu nae kya kawbya thawpaw kae pya oh: lukheit te lukheit sungsakuh oh. Kae nynh kae sungsah oh hawte lukheit te lukheit nah sungsakuh hahe cih oh. **35** Lukheit te lukheit kya sungsakunaw nah hoilang ohze humhung miakaw nynh ka zuitu nah thua ohpaw kha ae nyh cih oh,” a ci.

Jesuh Nynh Peter Nynh A Vuanawlangpaw Kong A Hoty

36 Simon Peter nynh, “Bawipaw, paw kalanmou na cceih ci?” cite a khia. Jesuh nynh, “Ka ccianawlang tuh nae zui kho loh ngaw khy, thuasalama nyalang nae zui ci,” cite a let. **37** Peter nynh, “Bawipaw, pawccemou atu kya kae zui kho khy? Na hanlang chilang ka ngangkuh khaw!” a ci. **38** Jesuh nynh, “Ka hanlang chilang na ngangkuh ccaccing tou? Baccacking kae hopya: aw a khua mawze ‘Amaw tuh ka nyh khyh,’ cite vaethum nae cih ci,” a ci.

Jesuh Tuh Paw Kalan Thuanawpaw Laanpi

14:1 Jesuh nynh a zuituhae kyakhe, “Lung vawsaw, lungriathaete um nang oh. Pachia zyn ohla kae khazema oun zyn oh. **2** Ka Paw inn kya tuh innkhaan patae um, te nanin hanlang umnaw paccyng khylang ka cceih ci. Tute athua khyh langze hynte kae hopalang khyh oh. **3** Te ka cceiza nanin umnaw kae paccyng koute kae ki ciza ka umnaw kya nah um buanawlang

oh kae hoy cih oh. **4** Ka ccianawlangpaw kya e laanpi tuh nah ny oh,” a ci. **5** Thomas nynh, “Bawipaw, pawkalan nynh na ccia ngaw ci paw kae nyh khy; tukeiccuze pawtemou tuinkya thuanawpaw laanpi tuh kae nyh ci?” a ci. **6** Jesuh nynh, “Kae tuh laanpi, baccing te hiinnaw nynh ka thua; kaekah kyate holeite tuh Paw kalan hum sangma thua kholang khyh hae. **7** Atulya kae hyn nae nyvae ohza ka Paw zema nah nyh cih oh, te atu kyate amaw kha nah nyh ohza nah muivae oh,” a ci. **8** Filip nynh a kyakhe, “Bawi paw, Paw tuh oun muisah tua; tuh e tuh kae peki ccackingpaw nynh athua,” a ci. **9** Jesuh nynh, “Nae kya ccyh saepi ka umvaepawte atu cia nae nyh loh khyh tou, Filip? Humzema kae oun muivaepaw tuh ka Paw kha a muivae. Pawccemou, ‘Na Paw oun muisah tua,’ cite nae khia ung? **10** Kae hyn ka Paw lungkhu ka umza ka Paw hyn ka lungkhu kya a um ci paw na zyn khyh tou, Filip? Nanin kya ka hopaw hyn ka lungkhu kyate oun thopaw thuakhy; ka lungkhu kya a umpaw ka Paw ryalawnaw kyate nynh oun thua. **11** Kae hyn ka Paw lungkhu ka umza ka Paw hyn ka lungkhu kya nynh a um cite ka hopaw hyn zyn oh. Tuh e nah zyn kho khyh oh athuaze uccaw ka raepaw keiccu sang hynh oun zyn oh. **12** Baccacking kae hopya oh: kae oun zyntu nynh tuh ka raepaw hyn a rae bua ci, pawccecize ka Paw kalan ka ccia ngaw keiccuze hynh laeze uccaleepaw cia a rae cipaw nynh athua. **13** Te ka Paw phu-enaw tuh Ccapaw kyate alangkunawlang ka minte nah ngia ohpaw balyn tuh kae raepah cih oh. **14** Pawpaw balyn ka minte kae kha nae ngialang ohze kae raepah cih oh.

Thya Muisaw Bakinnaw

15 “Kae nae sungsah oh langze ka kawbyahae nah zui cih oh. **16** Paw kalan ka ngia cize nae kya zungzae a umlangpaw ccangpaw Bawmtu ae pya cih oh. **17** Amaw tuh Muisaw thuaza Pachia baccing a langsakutu nynh athua. Laephi nynh amaw tuh ccou khy, pawccecize amaw kha muih kho khyza nyh kho khy. Thuasalama nanin nynh amaw tuh nah ny oh, pawccecize amaw tuh nae kya umza nae lungkhu kya a um keiccu nynh athua. **18** “Ka cciavaeze nae makhaete kae cciatawleng khyh oh; nae kalan bua kae ki ci. **19** Sosoh tari kya laephi nynh oun muilang khy,

thuasalama nanin nynh nae muih cih oh; te ka hiin keiccuze nanin zema nah hiin bua cih oh. **20** Tuh e nin oun thuate kae nae lungkhu ka um hawte ka Paw lungkhu ka umpaw te nanin ma ka lungkhu nah um ohpaw kha nae nyh cih oh. **21** “Humzema ka kawbyahae pawmza a zuipaw tuh oun sungsatu nynh athua. Humzema kae oun sungsatu miakaw tuh ka Paw nynh a sungsah ci; kae nynh ma ka sungsah ciza a kya ka phykuh ci,” a ci. **22** Judas Iskariot athualeipaw Judas nynh, “Bawipaw, pawtemou laephi kya thualeite kae kya hein na phyku kho ngaw?” a ci. **23** Jesuh nynh a kyakhe, “Humzema kae oun sungsapaw tuh ka ccanpyapaw a zui ci. Ka Paw nynh a sungsah ciza ka Paw thuasa, kamaw thuasa, kae thua ciza amaw kya kae um ci. **24** Humzema kae oun sungsaleipaw nynh tuh ka ccanpyapaw ma zui khy. Te ccanpyakunaw nah thae ohpaw hyn ka lungkhu kyate oun poupaw thuakhy, thuasalama oun shawtupaw ka Paw kyate oun thuapaw nynh athua. **25** “Nae kya ka um lyaze hynh e tuh kae hopyavae oh. **26** Ka minte ka Paw nynh oun shaw cipaw Bawmtu Thya Muisaw nynh pawpaw balyn ae ccanpah cih ohza kae hopyavae ohpaw balyn kha ae tuasathui cih oh. **27** “Nae kya daenaw kae cciatawpya oh; ka daenaw kae pya oh. Laephi nynh ae pya oh hawte kae pya khyh oh. Lungvawsaw, lungriathaete um nang oh; rhi zema rhih nang oh. **28** Nanin kyate, ‘Ka cceih ci, thuasalama nae kalan bua kae ki ci,’ ka ci paw kha nah thae oh. Nae sungsah ccacring oh langze Paw kalan ka ccialangpaw hyn nae lung atua ci; pawccecize amaw tuh kae laeze a leehua. **29** Ka ho hawte oun cyikute nah zynnawlang oh atu acyiku maw kya kae hopyaty oh. **30** Nae kya ccyh saepi bya ka ho kho khy; pawccecize hynh e laephi uktupaw oun thuavae. Ka tungvaw kya kaw pawsangma hoi khy, **31** thuasalama Paw ka sungsapaw kha laephi nynh a nyh hahe ci; pawccecize kaw oun pya thyhawte pawpaw balyn kha ka rae keiccu nynh athua. “Rang oh, hein hmin kyate cceih oh si.

Mitsur ku Ccacring Jesuh

15:1 “Mitsur ku ccacring tuh kamaw hynh ka thuaza ka Paw tuh kokhu hoitu nynh athua. **2** Kae kyate a thaeeleipaw aran balyn kha marya bae

haeza a thaeepaw aran miakaw nynh hou ah thaeanawlang hae te athyanawlang thyasah athua. **3** Nanin tuh kae ccanpya ohpaw liate nah thyavae oh. **4** Kamaw kya kyngkuh ohla kae zema nae kya ka kyngkuh ci. A ran nynh amakhaete thaee kho khy; mitsur ku kya nah kyngku khyh ohze nah thaee kholang khyh oh. **5** “Kae tuh mitsur ku ka thuaza nanin tuh aranhae nynh nah thua oh. Humzema ka kya a kyngkupaw tuh kae zema a kya ka kyngkuh ciza thaee patae a thaee ci; pawccecize kae leite pawsangma nah rae kho khyh oh. **6** Humzema ka kya a kyngkuleipaw tuh ah vuahaepaw aran roupawte nynh aloku; tucihawpaw aran tuh soiluate maei lungkhu lang vua haeza marya a u. **7** Ka kya nah kyngkuh ohza ka bya nae lungkhu a um langze nah ry ohpaw miakaw nah ngia oh langze nah mawe cih oh. **8** Thaee patae nah thaeanaw oh liate ka Paw phu-enaw kha nah langsaku oh; tuhawte nynh ka zuitulang nah tangnaw oh zema athua. **9** Ka Paw nynh oun sungsah hawte kae sungsah bua oh; ka sungsanaw kya hyn um zungzae oh. **10** Ka Paw kawbyahae kha ka zuiza a sungsanaw kya ka um hawte ka kawbyahae nah zuilang ohze ka sungsanaw kya nah um cih oh. **11** “Ka lungtuanaw tuh nae lungkhu umza nae lungtuanaw accinnawlang hynh e hyn kae hopya oh. **12** Ka kawbya tuh hynh e hynh nynh athua: kae sungsah oh hawte lukheit te lukheit sungsakuh oh. **13** Ccungccaw lukheit nynh a banhae hanlang sungsanaw aleehuapaw a hoi khopaw tuh mimin hanlang a hiinnaw pya kha nynh athua. **14** Kaw kae pya ohpaw nah laaw oh langze nanin tuh ka banhae nynh nah thua oh. **15** Nanin tuh sinumhae kae civaelang khyh oh, pawccecize sinum nynh a zuaapaw a laawpaw kha nyh khy. Tulaeze, ka banhae kae civae oh, pawccecize ka Paw kyate kae thaepaw miakaw balyn kae hopyavae oh. **16** Nanin nynh nae po khyh oh; kamaw nynh kae po ohza zungzaete atynpaw thaee patae nah thaeanawlang oh kae shaw oh. Te ka minte Paw kalan nah ngia ohpaw balyn ae pya cih oh. **17** Tuinte ka kawbya kae pya ohpaw tuh: lukheit te lukheit sungsakuh oh.

Laephi Nynh Huanaw

18 “Nanin hyn laephi nynh ae hua oh athuaze kae hyn a huatyvae hae ci

kha nyh oh. **19** Laephi uccaw lah thua oh laze laephi nynh ka uccaw cite ae sungsah cih ohpaw nynh athua. Thuasalama hynh e laephi kyate kae povae ohza a uccaw nah thuavae khyh oh; tukeiccu nynh laephi nynh ae hua oh. **20** Kae hopya ohpaw hyn ccykekuh oh: ‘A zuaapaw laeze aleehuapaw see um khy’. Kae hyn vawsaw oun pyalang haeze nanin zema vawsaw oun pya cih ohza kae ccanpyanaw oh ah zuilang haeze nanin ccanpyanaw zema oun zui cih hae. **21** Thuasalama ka ccungccaw nah thua oh keiccuze hynh e uccaw balyn tuh nae tungvaw kya oun rae cih hae; pawccecize kae oun shawtu kha nyh khyh hae. **22** Mih kya thualei, holeite ka lah um langze mih tungvaw seinaw umlang khy; thuasalama atuhawpaw tuh mih seinaw keiccuze beilangpaw pawsangma hoi khyh hae. **23** Humzema kae oun huapaw tuh ka Paw khazema a hua bua. **24** Mih laku kya hum nynh sangma ah lah rae boyleihaepaw uccawhae kha raeleite ka lah um salaze mih tungvaw kya seinaw umlang khy; thuasalama atuhawpaw tuh ka uccaw raepaw mang ah muih hae pite ka Paw ryte oun huakheih hae. **25** Hynte acyiku aho, pawccecize mih kawbya lungkhu kya, ‘Pawsang athualeipaw keiccuze kae kha oun hua hae,’ cite a zeikupaw accingnawlangpaw nynh athua. **26** ‘Ka Paw kyate Bawmtu—Muisaw tuh oun thua ciza amaw tuh Pachia kong backing a langsakupaw nynh athua ci. Ka Paw kyate nae kalan kae shaw ciza ka konglang oun ho ci. **27** Nanin zema atakawte ka kya nah umvae oh keiccuze ka konglang nah ho bua cih oh.

16:1 ‘Nae zynnaw kyate nah khyliaku khyhnawlang oh hynh e hyn kae hopya oh. **2** Sinakokhae kyate ae dei cih oh; humhung nynh zema nanin chia hynh Pachia ryaatu nynh kae thua cite oun tuaku nin hae ccyh oun thua ci. **3** Ka Paw te kae kha oun ny khyh hae keiccuze hynhawte ccungccawhae nynh nae tungvaw kya oun rae cih hae. **4** Thuasalama hynh e hyn kae hopyavae oh, pawccecize nae tungvaw oun rae hae te kae hopya ohpaw kha oun nyh cih oh.

Thya Muisaw Ryalawnaw

“Nae kya ka um keiccuze hynh e hyn a takawte kae hopah khyh oh. **5** Thuasalama atu tuh oun shawtupaw kalan ka cceivae ci; hum nynh sangma teilangmou na cceih cih cite nae khia khyh oh. **6** Te atu tuh kae hopyavae oh keiccuze nae ngae athah ci. **7** Thuasalama baccacing kae hopya oh: ka cciapaw hyn nae hanlang ahooyhua, pawccecize ka ccia khyh athuaze nae kalan Bawmtu thua thyalang khy. Thuasalama ka ccialang athuaze nae kalan amaw kha kae shaw ci. **8** Te amaw oun thuate tuh laephi ccungccawhae kya seinaw kong mih tuanaw a sei zia, baccing kong mih tuanaw a sei zia te Pachia bapianaw mih tuanaw a sei zia kha a langsakuh ci. **9** Seinaw kong mih tuanaw a sei, pawccecize kae oun zyn khyh hae; **10** paw hynh mou baccing ci paw kong mih tuanaw a sei, pawccecize ka Paw kalan ka cceih ciza nae muivae ngaw khyh oh keiccu nynh athua. **11** Te bapianaw kong mih tuanaw a sei, pawccecize hynh e laephi uktu hyn byapiaty athuavae keiccu nynh athua. **12** ‘Nae kya holangpaw patae ka hoi, thuasalama atulya tuh nah ccykekuh taelang khyh oh. **13** Muisaw oun thuate tuh Pachia baccing langsakutu athua keiccuze nanin kha baccing kalan ae cciakhae cih oh. Amaw kawte pawsangma holang khy, thuasalama a thaepaw kha a ho ciza oun thua cipaw kong zema ae hopah cih oh. **14** Amaw nynh phu-enaw kha oun pya ci, pawccecize ka hopaw kha a lak ciza nae kya oun ho ci. **15** Ka paw nynh hoipaw balyn tuh ka uccaw nynh athua; tukeiccuze Muisaw nynh oun pyapaw tuh a lak ciza nae kalan ae hopah cih oh, cite kae hopya naw oh paw tuh athua.

Ngaethyanaw Te Lungtuanaw

16 “Sosoh tari kya nae mulang khyh oh, sosoh nukhute bua nae muih cih oh,” a ci. **17** Abang zuituhae nynh mimaw te mimaw kha, “Hynh e suilan hyn pawpei, ccyh sosoh tari kya nae mulang khyh oh, te sosoh nukhute bua nae muih cih oh oun ci. Te, ‘Paw kalan ka ccia ngaw keiccuze,’ cite khe oun ci ki. **18** ‘Sosoh tari kya,’ ci paw hyn asuilan pawpei?” a horypaw hyn ah nyh khyh oh rei!” cite ah hokuh hae. **19** A kya bua khia ah ryhaepaw kha Jesuh nynh nyza mih kyakhe, “Kae hyn, ‘Ccyh sosoh tari kya nae mulang khyh oh, te sosoh nukhute bua nae muih cih oh,’ ka ci

pawte tou nanin lukheit te lukheit bya nah khiaku oh? **20** Baccacking kae hopya oh: nae rah, nae sia cih oh, thuasalama laephi tuh a lung atua ci, nae ngae oun thah ci, thuasalama nae ngaethyanaw tuh lungtuanawlang oun tang ci. **21** Nopi nynh imua a puidyngze a ngae a thah, pawccecize a te-ing ccyh thuavae; thuasalama imua oun puite a te-ingnaw kha marya a ning, pawccecize laevawlang imua lukheit a puipaw lung a tua keiccu nynh athua. **22** Tuhawte nynh nanin ma nah thua cih oh: atulya nae ngae a thah, thuasalama bua kae muih ki cih ohza nae thinlung tuh lungtuanawte a beih ci; tuh e lungtuanaw tuh hum nynh sangma ae lua khovaelei ohpaw lungtuanaw nynh athua. **23** “Tuh e nin oun thuavaeze pawsangma nae kхиаваелang khyh oh. Baccacking kae hopya oh: ka minte nah ngia ohpaw miakaw ka Paw nynh ae pya cih oh. **24** Atu ryacia ka minte pawsangma nah ngia boy khyh oh; nae lungtuanaw accinnaw elang ngia ohla nah muih cih oh.

Laephi Taenaw

25 “Atu cia tuh hynh e kong ka hovaeze tousenaw cci nynh ka mang. Thuasalama tousenaw mangvaeleite baphawte ka Paw kong ka honaw ccyh oun thua ci. **26** Tuh e nin oun thuavaeze a kalan ka minte nae ngia cih oh; nanin ccaanlangte kae ngiapah cih oh cite ka ho khy, **27** pawccecize ka Paw amaw ccacci nynh ae sungsah oh. Pachia kyate kae thuapaw kha nae zyn ohza nae sungsah oh keiccuze nanin kha ae sungsah oh. **28** Paw kyate kae thuaza laephi kalan kae thua; te atu laephi ka cciataw ciza Paw kalan ka cceih ci,” a ci. **29** Te a zuituhae nynh a kyakhe, “Atu tuh tousenaw mangvaeleite baphaw ccite nae hopyavae. **30** Pawpaw balyn na ny kha kae nyvae; hum nynh sangma khia na hovae khy. Tuh e nynh Pachia kyate nae thua kha oun zyn sa,” ah ci hae. **31** Jesuh nynh mih kyakhe, “Atu nah zyn oh tou? **32** Nae balynte pong phiaku nae thua cih ohza nae inn lang raveh nae cceih cih oh, te ka makhaete nae cciataw nin oh ccyh oun thua ciza atu hyn athuavae. Thuasalama kamaw makhae tuh ka thuakhy, pawccecize Paw ka kya a um. **33** Kae te nah kyngkunawlang oh te ngaengannaw nah hoi khonawlang oh hynh e hyn kae hopyavae oh.

Laephi nynh nanin kha vawsawnaw ae pya cih oh. Thuasalama nae rhawhooy sa! Laephi tuh ka taevae!” a ci.

Jesuh Nynh Zuituhae Hanlang Saw A Sang

17:1 Jesuh nynh hynh e bya a ho koute vaaw lang dote, “Ka Paw, accyh azawvae. Ccapaw nynh phu-enaw ae pyanawlang na Ccapaw kya phu-enaw oun pya tua. **2** Pawccecize amaw kya na pyapaw nynh ccungccawhae kya zungzae hiinnaw a pyanawlang hae ccungccaw miphuin miakaw tungvaw kawhoinaw tuh amaw kha na pyavae. **3** Te zungzae hiinnaw ci paw tuh ahmepaw Pachia namaw ny te na shawpaw Jesuh Kri ny kha nynh athua. **4** Na phu-enaw kha laephivaw kya ka langsakuva; laawlang nae pyapaw rya ka thasavae. **5** Ka Paw, laephi rae mawze namaw ryte phu-enaw ka lah hoipaw kha atu na malang hein oun pya tua. **6** “Laephi kyate na ko haeza na pyahaepaw kyahin na min tuh ka langsakuva. Mimin tuh na hangpaw thua haeza ka kalan nae pyahaepaw nynh ah thua hae. Na bya kha zui haeza, **7** te atu tuh ka kyaze nae pyapaw balyn hyn na kyate oun thuapaw nynh ah thua hae ci kha ah ny hae. **8** Nae pyapaw na bya kha ka hopah haeza ah pawmvae hae; na kyate oun thuapaw ka thuanawpaw baccing kha nyh haeza nae shawpaw ka thua khazema oun zyn hae. **9** “Mimin hanlang saw ka sangza laephi hanlang saw ka sang khy; thuasalama nae pyahaepaw hanlang saw ka sang, pawccecize na uccaw nynh ah thua hae. **10** Ka hoipaw balyn hyn na uccaw thua haeza na hoipaw balyn hynma ka uccaw nynh ah thua hae; te mimin kyate ka phu-enaw tuh alangku. **11** Te atu na kalan kae cceih ci; laephi kya ka umvaelang khy, thuasalama mimin tuh oun um ung cih hae. Athyapaw ka Paw, nang te kae tuh pyngkheit ah thua hawte laephi kya a um unghaepaw kha pyngkheit ah thua thyanawlang hae nae pyapaw na min huhante mimin tuh khum tua hae. **12** Mih kya ka umlya tuh nae pyapaw na min huhante mimin tuh ka khyngsah hae. Ccathya accingnawlang a zolangpaw ccungccapaw holeite tuh mimin kha marya ka khyngsah hae. **13** Atu tuh na kalan kae cceivae ciza laephivaw kya hynh e hae ka honawpaw tuh ka lungtuanaw kha mih thinlung kya a beilangte ah

hoi thyanawlang hae nynh athua. **14** Kamaw hyn laephi uccaw ka thuakhyh hawte mimin zema laephi uccaw ah thuakhyh hae keiccuze na bya mih kya ka hopyavae haeze laephi nynh mimin kha a hua hae. **15** Mimin kha laephi kyate lak hae cite kae ngia khy, thuasalama ahooyleipaw kyate khyndadylang naung hae cite nynh kae ngia. **16** Kae tuh laephi uccaw ka thuakhyh hawte mimin zema laephi uccaw thua bua khyh hae. **17** Mimin kha na kyakhe baccingte thyasah tua hae; na bya tuh baccing nynh athua. **18** Laephi kalan nae shaw hawte mimin kha laephi kalan ka shaw hae. **19** Te mimin zema na kya baccingte thyasah ah thuanawlang hae kae zema mimin keiccuze na kyakhe ka thyasakuh bua. **20** “Mimin hanlang kyalya saw ka sang khy, thuasalama mimin bya thungte kae oun zyn cihaepaw hanlang zema saw ka sang. **21** Mih balynte pyngkheit ah thuanawlang hae saw ka sang. Ka Paw, nang tuh ka lungkhu na umza kamaw ma na lungkhu ka um hawte mimin zema ah lungkhu kya beh um bua hae sa. Namaw nynh nae shawpaw hyn laephi nynh ah zyn thyanawlang hae mimin tuh pynkheitlang beh tang hae sa. **22** Nang te kae tuh pyngkheit ah thua hawte mimin zema pyngkheitlang ah tang thyanawlang hae namaw nynh nae pyapaw phu-enaw kha mimin ma ka pya bua: **23** Kae nae sungsah hawte mimin na sungsanawhaepaw te kae nae shawpaw hyn laephi nynh a nynawlang nang ka kya na umza kae mih kya ka umnawpaw tuh mimin pynkheitlang ah tangnawlang hae nynh athua. **24** “Ka Paw, nae pyapaw phu-enaw hyn ka umnaw miakaw umsa ka ryhaepaw nae pyahaepaw nynh ka phu-enaw kha ah muih cih hae; pawcccecize laephi rae mawte nae sungsavae. **25** A dingpaw ka Paw, nang tuh laephi nynh ae nyh khy, thuasalama kae nynh tuh kae nyza hynh e hae nynh nae shawpaw kha ah ny hae. **26** Nae sungsanaw tuh mih lungkhu kya umza kae ma mih lungkhu kya ka umnawlang na min tuh mimin kya ka nysah haeza tuhawte zungzae ka nysah cih hae,” a ci.

Jesuh Kyngnaw

18:1 Jesuh nynh saw a sang koute a zuituhae ryte Kidron vaw rawlang ah cceih hae. Tuinkya kokhu sankheit umza Jesuh te a zuituhae tuh tuin

kalankhe ah tee hae. **2** Tuh e kokhu tuh Jesuh te a zuituhae ah tongkuhenaw hae athua keiccuze phetu Judas nynh pawky a um ci paw kha a ny. **3** Tukeiccuze Judas tuh silawtu piccanhae te Farasihae nynh oun shawhaepaw Rom rhawkaw phukheit te beikinn rintuhae ryte ah cceih hae; mimin nynh zunghe te maei-inn, maeiccaw ryte ah cceih hae. **4** Jesuh nynh a tungvaw kya acyikuh cipaw balyn kha a ny kou keiccuze cciadoy haeza mih kyakhe, “Hummou nah ccung oh?” cite a khia hae. **5** Mimin nynh, “Nazarethpaw Jesuh,” ah ci hae. Jesuh nynh, “Kae hynh nynh ka thua,” a ci. A phetu Judas tuh mih pe kyakhe a thadyn. **6** Jesuh nynh, “Kae hynh nynh ka thua,” a ci paw kha ah thae hae te nulang thungkuh haeza lae kalan ah khyliakuh hae. **7** Jesuh nynh, “Hummou nah ccung oh?” a ci ki. Mimin nynh, “Nazarethpaw Jesuh,” ah ci hae. **8** Jesuh nynh, “Kae hynh nynh ka thua, kae cipyavae oh. Kae hynh nae ccung oh athuaze miccanghae hynh tuh cciasah oh,” a ci. (**9** Hynte a cinawpaw tuh, “Ka Paw, ka kuit lungkhu nae pyapaw tuh lukheit sangma ka zosahaepaw um khy,” a ci paw kha accingnaw elang nynh athua.) **10** Simon Peter nynh, thaloy a vawkupaw kha oun dungkuza Silawtu Lupi seepaw a ranglang nakua thohpaelang a bae. Seepaw a min tuh Malkhus nynh athua. **11** Jesuh nynh Peter kyakhe, “Na thaloy kha a bu lungkhu lang sang! Ka Paw nynh oun pyapaw ingnaw banan hyn ka nia leilangte tou nae tua?” a ci.

Annas Malang Jesuh

12 Tuinte Rom rhawkawhae mih Bawipaw te Judah palikhae ryte Jesuh tuh kyng haeza ah hei hae, **13** te masaty Annas kalan ah cciakhae hae. Annas tuh tuin kum kya Silawtu Lupi a latu Kaifas a zu paw nynh athua. **14** Kaifas tuh ccungccawhae ccaanlang ccungccaw lukheit chi ahooyhua cite Judah kawhoituhae kya ruanaw a pyatu nynh athua.

Peter Nynh Jesuh A Vua

15 Simon Peter te ccangpaw zuitu nynh Jesuh kha ah zui hae. Tuh e ccangpaw zuitu tuh Silawtu a lah nyvaepaw thuaza a Lupi maepah lang

Jesuh ryte ah tee hae. **16** Peter tuh sakuih lialangte nynh a um. Tuinte ccangpaw zuitu nynh atolang khe toykuza sakuih kya umnung nopinung kha beikza Peter tuh a lungkhu lang a teekhae. **17** Sakuih kya umnung nopinung nynh Peter kyakhe, “Khuh e paw zuituhae lakuze lukheit na thua khyh zaw?” a ci. Peter nynh, “Ka thuakhy,” a ci. **18** Khua acci keiccuze sinumhae te beikinn rintuhae nynh maeahoite maeituakuh haeza thadynlangte ah ekuh hae. Peter zema lah cceih buaza mih kyakhe thadynlangte a ekuh bua.

Silawtu Lupi Nynh Jesuh Bya A Khia

19 Silawtu Lupi nynh Jesuh kha a zuituhae te a ccanpyanaw konglang a khia. **20** Jesuh nynh, “Alangkulangte ccungccawhae balyn ah pumkunaw hae sinakokhae te Beikinn kya ka ccanpya hae. Aphirulangte ka hopaw umboy khy. **21** Tute athua pite pawccemou bya nae khia oh? Ka hopaw bya a thaehaepaw kha khia tua oh. Ka hopyahaepaw kha khia tua ohla pawmou ka hopya hae ci paw kha ah nyh cih hae,” a ci. **22** Tucite a hopawte tuinkya a umpaw beikinn rintuhae lakuze lukheit nynh Jesuh tuh biazza, “Silawtu Lupi kya pawtemou tute a ho ngang!” a ci. **23** Jesuh nynh, “Ka ho seipaw a um langze ka ho seipaw tuh hein umhaepaw kya ho tua! Thuasalama ka hopaw hyn ahmepaw ka ho athua langze pawccemou nae bia?” a ci. **24** Tucite Annas nynh a heikuh pite Silawtu Lupi Kaifas kalan a ky.

Peter Nynh Jesuh A Vua Ki

25 Peter tuh tuinkya maei ekute a thadyn. Abanghae nynh a kyakhe, “Nang hynh zema khah e paw zuituhae lakuze lukheit na thuakhyh zaw?” ah ci hae. Thuasalama Peter nynh pheikuza, “Ka thuakhy,” a ci. **26** Silawtu Lupi seehae lakuze lukheit, Peter nynh a nakua thohpaelang a baepaw ccanvaepaw nynh, “Jesuh ryte kokhu kya kae muipaw na thuakhyh tou?” cite a khia. **27** Peter nynh, “Ka nyh khy,” a ci ki. Tuinte aw oun khua.

Pilat Malang Jesuh

28 Awkhua takawte Jesuh tuh Kaiafas inn kyate mangki inn lang ah cciakhae hae. Judah kawhoituhae tuh mangki inn lungkhu lang tee khyh hae, pawccecize mih phung thyhawte ccirarilangte Pongpou looh ae ah ry hae keiccu nynh athua. **29** Tukeiccuze Pilat nynh toykuza mimin kyakhe, “Hynh e paw hyn paw seinaw mou a hoi?” cite a khia hae. **30** Mimin nynh, “Seinaw hoi khyh salaze hynte kae cciakhaelang khy,” cite ah khung hae. **31** Pilat nynh mimin kyakhe, “Tute athuaze naemaw nynh cciakhae ohla naemaw phung thyte a bya tuh lah pia oh,” a ci. Mimin nynh, “Kaenin tuh ccungccaw chianaw kaw kae hoi khy,” ah ci hae. (**32** Jesuh nynh paw chinaw mou a ing ci, ci paw kha a lah hotypaw accingnaw elang hynhawte acyikunawpaw tuh athua.) **33** Pilat nynh a inn lungkhu lang teekite Jesuh tuh koza, “Judahae Siangpahrang na thua tou?” cite a khia. **34** Jesuh nynh, “Hynh e bya nae khiapaw hyn na lungkhu kyate oun poupaw tou, athuakhyze minghae nynh ka konglang ae hopyahaepaw tou?” cite a ci. **35** Pilat nynh, “Judahaelang tou nae tua? Ka kalan ae thuasahaepaw hyn na miphuiniae te silawtu piccanhae nynh ah thua hae. Paw uccaw mou na rae?” a ci. **36** Jesuh nynh, “Kae, ka peenaw tuh hynh e laephi kya thuakhy; ka peenaw tuh hynh e laephi kya thuasalaze Judah kawhoituhae kya thualeilangte ka zuituhae nynh ah dou cih haepaw! Ka peenaw ram tuh hynh e laephi kya thuakhy,” a ci. **37** Tukeiccuze Pilat nynh, “Siangpahrang na thua ccacring tou?” a ci. Jesuh nynh, “Nang nynh siangpahrang nynh na thua nae ci. Laephivaw ka puinuathepaw te ka thuanuathepaw tuh eenaw ccankheit athuapaw ho hynh nynh athua. Humzema baccing kya a umpaw tuh ka bya a ngae,” a ci. **38** Pilat nynh, “Pawpei baccing tuh?” a ci.

Jesuh Chialangte Bya Ah Pae Hae

Tukoute Pilat nynh atolang e ccungccawhae kalan toykuh kiza mimin kyakhe, “A tungvaw kya chialang ciate seinaw ka muih khy. **39** Thuasalama nae phung nah hoi ohpaw thyte Pongpou lungkhu kya

thongccah lukheit zungzae kae shawpya he oh. Judahae Siangpahrang hyn kae shawpyalang ohze nah ry oh ve?” a ci. **40** Mimin nynh siabiate, “Anin shawlang kae ry khy! (Barabbas nynh shaw kae ry!” ah ci hae. (Barabbas tuh miruh nynh athua.)

19:1 Tuinte Pilat nynh Jesuh tuh cciakhaeza a buasah hae. **2** Rhawkawhae nynh hinku kha lukhung-lang khepah haeza ah khungsah hae. Te boeisenpaw kha ah zingsah hae. **3** Te a kalankhe cceih haeza, “Judahae Siangpahrang tuh a hiinshe sae sa!” cih haeza ah bia hae. **4** Pilat tuh bua pou kiza mibuupi kyakhe, “Ngaetua oh! A tungvaw kya chialang ciate seinaw ka muih khy, ci paw langsakunawlang nae kalan kae cciakhae ngaw,” a ci. **5** Tucite hin lukhung khungkuza boeisenpaw zingkuteoun pou. Pilat nynh mimin kyakhe, “Dotua oh! Hynh e paw hynh nynh athua!” a ci. **6** Silawtu piccanhae te beikinn rintuhae nynh ah muih hae te sia haeza, “Vaelan kya khiade! Vaelan kya khiade!” ah ci hae. Pilat nynh mimin kyakhe, “Naemaw nynh lah cciakhae ohla vaelan kya lah khiade oh. Kae nynh tuh chialang ciate seinaw ka muih khy,” a ci. **7** Mibuupi nynh, “Phung kae hoiza tuh e thyte chialang accang, pawccecize Pachia Ccapaw nynh ka thua a ciku,” cite ah let hae. **8** Tuh e kha Pilat nynh a thaete a bung hououn zou. **9** A inn lungkhu lang tee kiza Jesuh kyakhe, “Paw kyatemou nae thua?” Nae khunglang khyh tou? Nang lawesanaw te vaelan kya chianaw kaw ka hoipaw hyn na nyh khyh tou?” a ci. Thuasalama Jesuh nynh khung khy. **10** Pilat nynh, “Nae khunglang khyh tou? Nang lawesanaw te vaelan kya chianaw kaw ka hoipaw hyn na nyh khyh tou?” a ci. **11** Jesuh nynh, “Ka tungvaw kya kaw na hoinawpaw tuh Pachia nynh kaw ae pyapaw liate nynh athua. Tukeiccuze nang laeze na kuit kalan oun thuasatupaw hyn a seihua,” a ci. **12** Tuh e kha Pilat nynh a thaete Jesuh lawesanawlangpaw laanpi muilang a zuaku. Thuasalama mibuupihae nynh siaki haeza, “Hynh e paw hyn na saw athuaze Rom Siangpahrang hawiccaw na thuakhyyh cinawpaw nynh athua. Hum ccungccaw nynh ma Siangpahrang nynh ka thua a ciku athua langze Rom Siangpahrang a doupaw nynh athua!” ah ci hae. **13** Tuh e bya kha Pilat nynh a thaete Jesuh tuh atolang kheoun poukhaeza, “Lungphae

Maepaw,” cihaepaw bapia-naw tungkhung kya a dahung. (Tuh e hmin tuh Hebru byate “Gabbatha,” ah ci hae.) **14** Pongpou Poy dyng thuaza ninthu nynh athua. Pilat nynh mimin kyakhe, “Nae siangpahrang tuh dotua oh!” a ci. **15** Mimin nynh siaki haeza, “Theih! Theih! Vaelan kya khiade!” ah ci hae. Pilat nynh, “Siangpahrang hyn vaelan kya khiadesah cite nae ry oh tou?” ah ci hae. Silawtu piccanhae nynh, “Siangpahrang kae hoipaw tuh Sizar kyalya nynh athua,” cite ah khung hae. **16** Tuinte Pilat nynh Jesuh kha vaelan kya khiadelangte a pya hae.

Jesuh Tuh Vaelan Kya Ah Khiade Hae

Tucite Jesuh tuh ah cciakhae hae. **17** A vaelantung puikute pouza “Luru hmin,” cihaepaw kya a thua. (Tuh e hmin tuh Hebru byate “Golgotha,” ah ci hae.) **18** Tuinkya Jesuh tuh vaelan ah tah hae; ccangpaw ccungccaw lunin zema voyrang kya tah bua haeza Jesuh tuh mih laku kya ah tah hae. **19** Pilat nynh syntawnaw ccaw zeiza vaelantung vaw a taw. A zeipaw tuh “Nazarethpaw Jesuh, Judahae Siangpahrang,” cite a zei. **20** Jesuh ah tanaw hae hmin tuh khopi kyate eih asaw khyh keiccuze tuh e ccaw tuh ccungccaw patae nynh ah ria hae. Syntawnawpaw tuh Hebru bya, Latin bya te Grik byate ah zei hae. **21** Silawtu piccanhae nynh, Pilat kyakhe, “‘Judahae Siangpahrang,’ ci thualeite, ‘Judahae Siangpahrang nynh ka thua, a ci,’ cite zei tua,” ah ci hae. **22** Pilat nynh, “Ka zeivaepawza ka zei thyte um sa,” a ci. **23** Rhawkawhae nynh Jesuh tuh vae-lan ah tah hae koute a boeinin kha lawkuh haeza zungkheit ccite ccou-nawlang zungpaleilang ah shei hae. Mimin nynh akawng umleilangte ah kuaahaepaw angkiccua khazema ah laaw hae. **24** Rhawkawhae nynh lukheit te lukheit kyakhe, “Hynh e angkiccua hynh tuh ah sheilang khyh oh; hummou a ccou cih ci paw nynawlang ccungccy nynh ah dung ngaw oh,” ah cikuh hae. Hynte acyikupaw tuh ccathya kyaze, “Ka boeinin tuh neikuh haeza ka angkiccua hanlang ccungccy ah dung hae,” a ci paw accingnawlang nynh athua. Tuh thyhawte rhawkawhae nynh a cyi hae. **25** Jesuh vaelantung pe khe a nung, a nung netanung, Klopas zu Mary te Magdala khua e Mary hae ah thadyn hae. **26** Jesuh nynh a nung te a

sungsapaw a zuitupaw tuinkya ah thadynhaepaw kha muiza a nung kyakhe, “Amaw kha na ccapaw nynh athua,” a ci. **27** Tuinte a zuitupaw kyakhe, “Amaw hyn na nung nynh athua,” a ci pya. Tuin ccyh kyate a zuitupaw nynh Jesuh nung kha a inn kya a um sa.

Jesuh Chinaw

28 Jesuh nynh pawpaw balyn kha atu tuh accinvae ci kha a ny; te ccathya kya e accingnaw elang, “Ka tui a haaw,” a ci. **29** Tuinkya mitsurtuiriapaw ankheit umza tuh e lungkhu lang boeipawe daung haeza hisop ccaungngoe kya heidete Jesuh khalan kya ah tu hae. **30** Jesuh nynh mitsurtuiriapaw tuh daweza, “Athavae,” a ci. Tuinte a lu tingza a chi.

Jesuh A Naw Ah Thuin Hae

31 Tuinte Judah kawhoituhae tuh Pilat kalan cceih haeza ah tahaepaw ccu khya khylang te vaelantunghae kya e mih ruaa laawlang ah ngia hae. Ah chiahaepaw kha Sabbath nin kyacia vaelantung vaw umlangpaw kha ah ry khyh hae keiccuze ccaccung Ninpangaw nin kya ah ngia hae. Sabbath nin tuh accihuapaw nin khe athua ki. **32** Tukeiccuze rhawkawhae nynh cceih haeza Jesuh ryte vaelan ah tah kheihapeaw lukheit ccu ah khya hae koute lukheitpaw ccu kha ah khya ki hae. **33** Thuasalama Jesuh kya ah thua haete a chivaepaw kha ah ny hae keiccuze a ccu kha khyavae khyh hae. **34** Rhawkawhae lakuze lukheit nynh Jesuh a naw kha a ccoyte thuinza vaekheitmawte chii te tui oun pou. (**35** Tute acyikupaw a muitupaw nynh a hopaw thuaza nah zyn thyanawlang oh ci hynh nynh athua. A hopaw hynh zema backing thuaza amaw nynh zema backing nynh ka ho ci paw a ny.) **36** Ccathya nynh, ‘A ru ccankheit sangma khya thualang khy,’ a ci paw kha a ccingnawlang nynh athua. **37** Te ccangpaw ccathya nynh, ‘Ah thuinhaepaw kha ccungccawhae nynh oun do cih hae,’ a ci ki.

Jesuh Unaw

38 Tukoute Arimathea khuapaw Josef nynh Jesuh ruaa laawlang Pilat

kalan a ngia. (Josef tuh Jesuh zuitu lukheit thua salazema Judah kawhoituhae kha a rhi keiccuze arulangte a zuipaw nynh athua.) Pilat nynh Jesuh ruaa kha na lak kho a cipy a keiccuze Josef nynh a laaw. **39** Jesuh te tongku khylang khuazi kya a lah cceih boypaw Nikodemas ma Josef kalan cceih buaza zimuin pawng zakheit loukaw aripaw mura zimuin te anro pykupaw kha oun ccyn g. **40** Mih luninte Jesuh ruaa kha lak haeza Judahae nynh michi ccy phungte zimuin ryte boeirawpawte ah laung hae. **41** Jesuh ah chianaw hae kyakhe kokhu sankheit umza tuinkya hum sangma ah ccy Boyleinaw hae ssaw thawpaw a um. **42** Sabbath nin mawtaraw thuaza ssaw tuh anae keiccuze Jesuh ruaa tuh tuinkya ah ccy hae.

Accawngpaw Ssaw

20:1 Nawpi nin khua a dae maw, Magdala khua e Mary tuh ssaw kalan lah cceiza athuhfu a nawekuvaepaw kha a mui. **2** Simon Peter te Jesuh nynh a sungsapaw ccangpaw zuitu kalan ccaweza mih kyakhe, “Ssaw kyate Bawipaw pheh ah laawvae hae, pawky a nynh ah naung hae ci paw kae nyh khy!” a ci. **3** Tuinte Peter te ccangpaw zuitu tuh ssaw kalan ah cceih hae. **4** Mih luninte ah ccawe hae, thuasalama ccangpaw zuitu tuh Peter laeze aranghualangte ccaweza ssaw kya a thua ty. **5** Ssaw lungkhu lang balingte doza khiarawpaw boei kha a mui, thuasalama a lungkhu lang tee khy. **6** A nulangte Simon Peter tuh oun thuaza ssaw lungkhu lang po a tee. Tuinkya boeirawpaw, **7** te Jesuh lu ah heinawhaepaw boei kha a mui. A lu heinawpaw boei tuh boeirawpaw ryte umleite bikute amakhaete a um. **8** Te ccangpaw zuitu, ssaw kya a thuatypaw zema ssaw lungkhu lang a tee bua; muiza a zyn. **9** (Chinaw kyate a thoothui hahe cih cite ccathya nynh a ci paw kha nyh loh khyh hae.) **10** Te zuituhae tuh mih inn langkhe ah ki hae.

Magdala khua e Mary Kya Jesuh A Langku

11 Mary tuh ssaw atolang thadynte a rah. Tute a rah lalialangte balingza ssaw lungkhu langkhe a do, **12** te arawpaw ah laawkuhaepaw vaawhae

lunin kha Jesuh ruaa ah naungnaw hae kya alia alute ah dahunghaepaw kha a mui. **13** Vaawhae nynh, “Pawccemou pi na raw, nopolung?” ah ci hae. Anin nynh, “Ka Bawipaw kha humhae nynh ma pheh lak haeza pawkyah nh ah naung hae ci paw ka nyh khy!” cite a khung hae. **14** Tuinte Mary nynh maekuza tuinkya Jesuh a thadynpaw kha a mui; thuasalama Jesuh athua kha nyh khy. **15** Jesuh nynh, “Nopolung, pawccemou pi na raw? Hummou na ccung?” cite a khia. Tute a beiktu kha kokhungawtu nynh athua cite a tua keiccuze Mary nynh, “Saya, namaw nynh na laaw athua langze na naungnaw kha oun hopah la ka cceih ciza ka lah lak ci,” a ci. **16** Jesuh nynh, “Mary!” cite a ci. Mary nynh Jesuh kalankhe hoyza Hebru byate, “Rabboni!” a ci. (Asuilan tuh “Saya,” cinawpaw nynh athua.) **17** Jesuh nynh Mary kyakhe,” Oun kyng nang! Pawccecize Paw kalan ka thua loh khy. Thuasalama ka unohae kalan lah cceih la mih Paw athuapaw ka Paw, mih Pachia athuapaw ka Pachia kalan ka kivae ci, a ci cite lah hopah hae oun ci,” a ci. **18** Tukeiccuze Magdala khua e Mary tuh cceiza Bawipaw a muinawpaw te a kya a hopaw balyn kha zuituhae kya a hopya hae.

Zuituhae Kya Jesuh A Langku

19 Nawpi nin zetepi khe zuituhae tuh pyngkheilang tongkuh haeza Judah kawhoituhae ah rhi hae keiccuze thuakawhae balyn maryah ah khawsungkuh hae. Te Jesuh tuh oun langkuza mih laku kya oun thadynte, “Nae kya daenaw um sa,” a ci. **20** Tuh e a ho koute mih kyakhe a kuithae te a naw kha a muisah hae. Zuituhae tuh Bawipaw ah muihaepawte lungtuanawte ah beih hae. **21** Jesuh nynh mimin kyakhe,” Nae kya daenaw um sa. Ka Paw nynh oun shaw hawte nanin ma kae shaw bua oh,” a ci ki hae. **22** Tuinte mih tungvaw kya a hy kha sawnua haeza, “Thya Muisaw ccou oh! **23** Minghae seinaw kha nah ngaeethya oh langze ngaeethya ah thua cih hae; mimin kha nah ngaeethyalang khyh ohze ngaeethya thualang khyh hae,” a ci.

24 Zuituhae laenin lakuze lukheit, Thomas (Ccaphei cihaepaw) tuh Jesuh a langku lyaze mimin kya um bua khy. **25** Tukeiccuze zuitu ccanghaepaw nynh a kyakhe, “Bawipaw kae mui!” ah ci pya hae. Thomas nynh mih kyakhe, “A kuit thingkhiate ah khianaw hae adaelaepaw ka muiza ka kuitte tuh e adaelaepaw te a naw kya adaelaepaw ka hae tualeite tuh ka zynlang khy,” a ci. **26** Nawkheit koute zuituhae tuh inn lungkhu kyakhe um haeza Thomas zema a um bua. Thuakawhae kha marya ah khaw hae, thuasalama Jesuh tuh oun langkuza mih laku kya thadynte, “Nae kya daenaw um sa!” a ci. **27** Tuinte Thomas kyakhe, “Heinkya na kuitdung oun naung la ka kuithae hyn oun do tua; te na kuit kha oun dyng la ka naw hyn oun hae tua, zynleite um nangvae; zyn ccavae!” a ci. **28** Thomas nynh, “Ka Bawipaw te ka Pachia!” a ci. **29** Jesuh nynh, “Nae muih keiccuze nae zyn thua ta? Kae oun muileipite oun zynpaw tuh lungtuapaw nynh athua!” a ci.

Hynh E Cca-uk Nynh Paccyngnaw

30 A zuituhae mitmuih kya Jesuh nynh ngae-annaw patae a raepaw hyn hynh e cca-uk lungkhu kya a zeileipaw patae a um. **31** Thuasalama hynh e hae balyn a zeinawpaw tuh nanin nynh Jesuh tuh Messiah, Pachia Ccapaw nynh athua cite nah zyn ohza amaw nah zynnaw oh liate hiinnaw nah hoinaw elang oh nynh athua.

Zuituhae Lusari Kya Jesuh A Langku

21:1 Tukoute Jesuh tuh a zuituhae kya Tiberias Tuili kya vaekheit a langkuh ki. A langkunaw tuh hynte nynh athua: **2** Simon Peter, Thomas (Ccaphei cihaepaw), Nathanael (Galilee pee Kanan khuapaw), Zebedi ccawhae te ccangpaw zuituhae lunin tuh pyngkheilang ah tongkuh hae. **3** Simon Peter nynh ccanghaepaw kyakhe, “Kae tuh ngasaw kynglang nynh ka cceih ci,” a ci. Mimin nynh, “Na kya kae cceih bua ci,” ah ci hae. Tukeiccuze long ccankheit lungkhu lang ah tee hae, thuasalama zi balyn pawsangma kyng khyh hae. **4** Khuanin oun thuadyn kya Jesuh tuh tui kin

khe a thadyn, thuasalama zuituhae nynh Jesuh ci paw nyh khyh hae. **5**
Tuinte anin nynh mimin kha, “Ccanvaehae, pawsangma nah kyng khyh oh tou?” cite a khia hae. Mimin nynh, “Pawsangma kae kyng khy,” ah ci hae.
6 Anin nynh mih kyakhe, “Nae mia kha long ranglang khe vua tua oh, ccapyh tuh nae kyng cih oh,” a ci. Tucite mih mia tuh vua haeza ngasaw patae ah bung hae keiccuze mih mia cia dung bia khovae khyh hae. **7**
Jesuh nynh a sungsapaw zuitu nynh Peter kyakhe, “Bawipaw nynh athua!” a ci. Peter nynh a thaete Bawipaw nynh athua ci paw kha nyza (a boeinin kha a lah khaku ty keiccuze) a angkilee kha kikuh kangmawza tui lungkhu lang a phaungku. **8** Ccangpaw zuituhae nynh ngasaw pheh beihpaw mia tuh long lungkhu kyate varang lang ah dung hae. Varanglang te eih sawvae khy, kaih zakheit loukaw nynh asaw ci. **9** Varang lang oun kae hae te maeihoi maei vawlang ngasaw te sanglou ccapyh ah ehaepaw kha ah muih hae. **10** Te Jesuh nynh mimin kyakhe, “Nah kyng ohpaw ngasaw tuh oun cciakhae oh,” a ci. **11** Simon Peter nynh long lungkhu lang kaeza ngasaw leepawte a beihpaw mia kha varang lang a dung. Ngasaw tuh zakheit sungpangaw zawthum acih; tucih lawng salama mia tuh sheikuh khy. **12** Jesuh nynh mimin kyakhe, “Rang ohla ae oh,” a ci. Zuituhae laku hum nynh sangma, “Hummou na thua?” cite khia ngang khyh hae; pawccecize Bawipaw ci paw kha ah nyvae hae. **13** Tukeiccuze Jesuh nynh cceiza sanglou kha a laaw, te mimin kha a pya hae; tuhawte ngasaw ma lakza a pya hae. **14** Hynh e tuh Jesuh chinaw kyate a thoothui koute zuituhae kya vaethumnaw a langkunaw nynh athua.

Jesuh Te Peter

15 Ah ae hae koute Jesuh nynh Simon Peter kyakhe, “Johan ccapaw Simon, hynh e hae nynh oun sungsah hae laeze nang nynh nae sung-sahua tou?” a ci. Anin nynh, “Athua Bawipaw, kae sungsapaw tuh na ny,” cite a let. Jesuh nynh a kyakhe, “Ka tuutarawhae kha lah do-oyh hae,” a ci. **16** Vaeninnaw Jesuh nynh, “Johan ccapaw Simon, nae sungsah tou?” a ci. Anin nynh, “Athua Bawipaw, kae sungsapaw tuh na ny,” cite a let. Jesuh nynh, “Ka tuuhae kha lah do-oyh hae,” a ci. **17** Vaethumnaw Jesuh nynh,

“Johan ccapaw Simon, nae sungsah tou?” a ci. Vaethum cia Jesuh nynh, “Nae sungsah tou?” cite a khia keiccuze Peter tuh a ngaethahza Jesuh kyakhe, “Bawipaw, nang nynh pawpaw balyn na ny kou; kae sungsapaw zema na ny!” a ci. Jesuh nynh a kyakhe, “Ka tuuhae kha lah do-oyh hae. **18** Baccacking kae hopya: na no lya tuh na paccyngkuza na rynaw miakaw lang na cceih kho; thuasalama nae tawvaete tuh na lan nae zo ciza ming nynh na kuithae kha ae hei cih hae, te na ccia ryleinaw lang kha ae cciakhae cih hae,” a ci. **19** (Hynte a hovaeze Peter hyn pawcihawpaw chinaw mou a te-ing ciza pawcihawpaw phu-enaw mou Pachia kalan a pya ci, ci kha Jesuh nynh a langsakunawpaw nynh athua.) Tuinte Jesuh nynh, “Oun zui!” a ci.

Jesuh Te Ccangpaw Zuitu

20 Peter nynh oun maekuza a nulang khe Jesuh nynh a sungsapaw zuitu kha a mui. Hynh e paw tuh looh ah ae lya haeze Jesuh ngikute, “Bawipaw, ae phetulangpaw tuh hummou?” cite a khiatu nynh athua. **21** Peter nynh tuh e paw kha a muite Jesuh kyakhe, “Hynh e paw hynh so pawtepei athua ci?” a ci. **22** Jesuh nynh a kyakhe, “Kae thua cia hiinlangte ka rypaw athua langze na hanlang pawtuamou a ung? Oun zui!” a ci. **23** Tukeiccuze hynh e zuitupaw tuh chilang khyh cite Jesuh zuituhae kya the athang. Thuasalama Jesuh nynh chilang khyh a ci paw thuakhy; a horypaw tuh, “Kae thua cia hiinlangte ka rypaw athua langze na hanlang pawtuamou a ung?” a ci paw nynh a thua. **24** Hynh e zuitupaw tuh hynh e hae konglang a hotu thuaza a zeitu zema athua; te a hopaw tuh ahmepaw nynh athua ci paw kae ny.

Bathanaw

25 Jesuh nynh a raepaw ccangpaw patae a um ung. Ccankheit kou ccankheit zei lah thua salaze cca-ukhae tuh laephi nynh ccawnglang khyh cite nynh ka tua.